

四庫全書

經部

欽定四庫全書

經部

禮記集言卷八

詳校官通政使<sub>臣</sub> 夢吉

給事中<sub>臣</sub> 溫常綬覆勘

總校官編修<sub>臣</sub> 王燕緒

校對官中書<sub>臣</sub> 潘奕雋

謄錄監生<sub>臣</sub> 汪元亮

欽定四庫全書

禮記纂言卷八

元 吳澄 撰

文王世子

方氏曰諸侯世子世國大夫不世爵故自諸侯以上之適子然後謂之世子此篇所言主於世子之事而文王之為世子可為法於後世故以名篇

世子之記曰朝夕至于大寢之門外問於內豎曰今日安否何如內豎曰今日安世子乃有喜色其有不安節則內豎以告世子世子色憂不滿容內豎言復初然後

亦復初朝夕之食上世子必在視寒煖之節食下問所膳羞必知所進以命膳宰然後退若內豎言疾則世子親齊玄而養膳宰之饌必敬視之疾之藥必親嘗之嘗饌善則世子亦能食嘗饌寡世子亦不能飽以至于復初然後亦復初

豎上主切食上時掌切齊側皆切養羊尚切

鄭氏曰世子之禮亡此存其記也朝夕朝朝暮夕也內豎小臣之屬掌外內之通命者節謂居處故事復初憂解也在察也問所膳問所食者羞必知所進必知親所食也親猶自也養疾者齊玄玄冠玄端也饌必敬視為疾者之食齊和所欲或異藥必親嘗試毒味也嘗饌善謂多於前復初復常所服也孔氏曰食



上謂獻饌食下謂食畢徹饌而下方氏曰色憂不滿容者蓋喜之類爲陽憂之類爲陰陽饒而陰乏故憂則容不滿也玉藻所謂親瘠色容不盛是也齊玄而養必致齊而身服玄也

### 右記世子之禮

文王之爲世子朝於王季日三雞初鳴而衣服至於寢門外問內豎之御者曰今日安否何如內豎曰安文王乃喜及日中又至亦如之及莫又至亦如之其有不安節則內豎以告文王文王色憂行不能正履王季復膳然後亦復初食上必在視寒煖之節食下問所膳命膳

宰曰未有原應曰諾然後退

朝音潮衣去聲又如字莫音暮後皆同

鄭氏曰三皆曰朝以其禮同御如今小史直日者文王乃喜者孝子恒兢兢也又復也履蹈地也復膳飲食安也末猶勿也原再也勿有所再進爲其失飪臭味惡也退反其寢也孔氏曰子朝父母每日唯二改內則云昧爽而朝日入而夕朝禮具夕禮簡今三朝禮同是聖人之法方氏曰內則言子事父母雞初鳴咸盥漱昧爽而朝日入而夕世子之記亦止言朝夕至於大寢門之外而此言雞初鳴而衣服至於寢門外則盥漱之時猶未雞鳴朝之時猶未昧爽矣又有日中之朝此蓋聖人之制內豎即周官掌內外之通令者御則御於君所者也與御妾之御同義節謂起居之節也不安節則以失常而疾生文王乃喜則親喜而已亦喜也文王色憂則親憂而已亦憂也復初則親復常故也視寒煖之節若食齊視春時飲齊視

冬時之類問所膳則欲知親之好羞也膳牢即膳夫也原與原蠶之原同

武王帥而行之不敢有加焉文王有疾武王不說冠帶

而養文王一飯亦一飯文王再飯亦再飯

說他活切飯扶晚切下皆

同

鄭氏曰帥循也庶幾程式之不說冠帶而養言常在側也一飯再飯欲知氣力箴藥所勝長樂劉氏曰文王減膳武王亦減膳文王加飯武王亦加飯以己程其親之食力也方氏曰武王之事文王盡循文王之所以事王季者而行之子之於親日三朝之外冠帶有時而說今爲親疾跬步不離不敢說冠帶人之飲食或䟽或數時其飢飽今以親疾志不在於飲食一飯再飯惟親之視不敢如平時私適其欲

旬有二日乃問文王謂武王曰女何夢矣武王對曰夢  
帝與我九齡文王曰女以爲何也武王曰西方有九國  
焉君王其終撫諸文王曰非也古者謂年齡齒亦齡也  
我百爾九十吾與爾三焉文王九十七乃終武王九十

三而終

女音汝  
後同

方氏曰旬有二日記其寢疾之日鄭氏曰間猶瘳也  
問何夢問後容臥也帝天也撫猶有也年天氣也齒  
人壽之數也九齡九十年之祥也孔氏曰文王繼王  
季爲西伯是殷之諸侯不合稱王廬陵胡氏曰武王  
意以齡爲善故當撫有九國按文王三分天下有其  
二而云九國未實詩書云王者皆追稱爾而此稱君

王皆不足信人之考折天定其數而吾與爾三是不知命非文王之言也書云文王受命惟中身服享國五十年中身謂五十也中身以後享國五十年則百矣云九十七非也澄曰此蓋周末之時有一等雜書之言以爲武王嘗侍文王之疾至旬有二日乃瘳而文王因問武王有何夢也其說皆謬妄不足深辯作記者又不能精擇而以附綴文武爲世子之事

### ○文王之爲世子也

鄭氏曰題上事也澄曰按古書之體多如此皆撮其事之綱以題於所紀事之後此句舊本誤在下章成王有過則撻伯禽之下今移真此章末

### 右記文武爲世子之禮凡二節

成王幼不能涖阼周公相踐阼而治抗世子法於伯禽  
欲令成王之知父子君臣長幼之道也成王有過則撻

伯禽所以示成王世子之道也

涖音吏相去聲長知兩切後皆同

方氏曰涖阼臨朝也阼者主人所有事之階故適子冠於阼以著代繼體之君臨朝行事謂之涖阼涖言臨之踐言履之成王主也故曰涖周公相之故曰踐此輕重之別也鄭氏曰成王幼不能視阼階行人君之事周公代履阼階攝治天下抗猶舉也謂舉以世子之法使與成王居而學之以成王之過擊伯禽則足以感喻焉孔氏曰周公舉世子之法於伯禽伯禽行世子之法以示成王欲令成王觀而法之若成王不能法效則答伯禽責其不能以世子之禮教成王也

仲尼曰昔者周公攝政踐阼而治抗世子法於伯禽所以善成王也聞之曰爲人臣者殺其身有益於君則爲之況于其身以善其君乎周公優爲之

于鄭讀爲迂或如字

此引夫子之言以證上文所記之事鄭氏曰聞之者聞之於古也于讀爲迂迂猶廣也大也孔氏曰仲尼聞古之言爲人臣者有益於君而處危亡縱或殺身猶尚爲之況周公善其君而居尊顯乃廣大其身乎是於身優饒也長樂陳氏曰迂身以善其君者易殺身以有益於君者難爲人臣者於其難者猶尚爲之況其易者乎此周公所以優爲之也方氏曰優言爲之有餘也于與于則于同廬陵胡氏曰漢書匈奴傳云于者廣大之貌澄按如方朔說則于讀如字

是故知爲人子然後可以爲人父知爲人臣然後可以爲人君知事人然後能使人成王幼不能涖阼以爲世子則無爲也是故抗世子法於伯禽使之與成王居欲令成王之知父子君臣長幼之義也

此言爲世子之時當教之以爲人子爲人臣爲人父知之義蓋知爲人子之義然後它日可以爲人之父知爲人臣之義然後它日可以爲人之君知爲人幼而事人之義然後它日可以爲人之長而能使人也成王年幼不能涖阼以行天子之事必須教之以爲世子之法然欲以成王爲世子而教之則今既不爲世子而爲天子矣無爲猶言不爲也是故舉世子所當學之法加之於伯禽之身使之與成王同居處成



王每日親見伯禽所學爲世子之法則自能知父子君臣長幼之義也父子君臣長幼之義即所謂世子法也上文言道此文言義道謂所由之路義謂所宜之理其實一也今按此篇所記周公之教成王可謂曲盡但稽之事實武王崩成王幼管蔡流言殷人謀叛其時周公即出居東而平殷亂伯禽亦出就封而征徐戎其後周公三年而歸則相成王東伐安得有伯禽同居學世子法之事或疑武王在時周公使伯禽與成王共學令觀伯禽所學而效之而記者誤傳以爲武王崩後之事也

○周公踐阼

鄭氏曰亦題上事澄曰舊本錯簡在下文世子之謂也下

右記成王學世子之禮凡二節

凡三王教世子必以禮樂樂所以修內也禮所以修外也禮樂交錯於中發形於外是故其成也惇恭敬而溫

文

鄭氏曰中心中也惇說惇孔氏曰樂以和諧性情禮以敬正容體樂雖由中從中而見外禮雖在外從外而入中交間錯雜於中宣發形見於外內外有樂心悅貌和故惇內外有禮貌恭心敬溫潤文章故恭敬而溫文馬氏曰樂修外禮修內教之始也此禮樂之分也禮交錯於中則不止於修外樂發形於外則不止於修內此禮樂之合也方氏曰兩相合謂之交兩相雜謂之錯溫則不褻文則不野惇言樂之成如此恭敬而溫文言禮之成如此

立大傳少傳以養之欲其知父子君臣之道也大傳審  
父子君臣之道以示之少傳奉世子以觀大傳之德行  
而審喻之大傳在前少傳在後入則有保出則有師是  
以教喻而德成也師也者教之以事而諭諸德者也保  
也者慎其身以輔翼之而歸諸道者也

大音泰少去聲行下孟切

真氏曰前言禮樂者教世子之具此言師傳者教世  
子之人養者從容啓迪其本然之善使之自然開悟  
也然其道無它不過君臣父子之大倫而已大傳以  
審示言謂修於身以示之也少傳以審喻言謂開說  
其義以曉之也大傳以身教少傳以言教二者互相  
發也師也者教世子以事而喻諸德謂教之以事親

之事則知孝之德教之以事長之事則知弟之德天下無事外之德也保則安護世子之身輔之翼之使歸諸道耳目口體不以欲而動即所謂道天下無身外之道也朱子曰養謂涵育薰陶俟其自化也鄭氏曰養猶教也言養者積浸成長之大傳示之爲行其禮少傳審喻之爲說其義在前在後謂在學時出入謂燕居出入時慎其身者謹安護之孔氏曰外有傳相內有師保是以世子於師教曉喻其德業成就師教世子以所行之事使世子曉喻於德義保則護慎世子之身輔相翼助使世子歸於道諸於也方氏曰禮樂者教之之道也有教之道苟非教之人則道不虛行故立大傳少傳以養之養之將以成其材也內則父子外則君臣人之大倫也教養之道欲其知此而已保則親也故入則有保師則正也故出則有師分而言之固如此合而言之則左右前後出入起居師也傳也保也未嘗不在焉

記曰虞夏商周有師保有疑丞設四輔及三公不必備  
唯其人語使能也

孔氏曰記者古有此記記曰至唯其人皆古記之語  
語使能一句是作記者解之也澄曰周之時大師大  
傅大保曰三公虞之時前疑後丞左輔右弼曰四輔  
周之師即虞之疑周之保即虞之丞周之傅即虞之  
輔弼夏商或與虞同或與周同不可考記者總虞夏  
商周言之故曰設四輔及三公言虞之設四輔及周  
之設三公皆不必備其官及者非謂既設四輔又設  
三公也師保之間不言傳疑丞之間不言輔弼者從  
省以便文也鄭氏曰記所云謂天子也語言也得能  
則用之無則已不必備其官也小人處其位不如且  
闕長樂陳氏曰有聖人之能有賢者之能所謂使能  
者兼聖賢而言山陰陸氏曰官不必備言難其人也

君子曰德德成而教尊教尊而官正官正而國治君之謂也

君子有德之稱上既引古記之言此又引有德者之言以足前義二德字其一衍謂師傳保得人則所教之人其德完成受教者之德成則教者爲有功而教者之道尊隆教者之道尊則所教之人能求賢審官而百官無不正百官無不正則君明臣良政事修舉而其國無不治如此則可以爲人君矣故曰君之謂也

○君之於世子也親則父也尊則君也有父之親有君之尊然後兼天下而有之是故養世子不可不慎也

凡天下之爲人父者於其子雖有父之親而無君之尊也凡天下之爲人君者於其臣雖有君之尊而無父之親也唯君之於世子其親則父其尊則君既爲之父又爲之君然後能兼天下尊親二者而有之有之謂有父之親有君之尊也彼但有父之親而無君之尊者猶不可不知教其子况兼親尊二者而有之者其於教世子而可以不慎乎慎謂盡其心盡其道而不敢忽慢簡略也鄭氏曰處君父之位而不能教其子則其餘不足觀矣

行一物而三善皆得者唯世子而已其齒於學之謂也故世子齒於學國人觀之曰將君我而與我齒讓何也曰有父在則禮然然而衆知父子之道矣其二曰將君

我而與我齒讓何也曰有君在則禮然然而衆著於君  
臣之義也其三曰將君我而與我齒讓何也曰長長也  
然而衆知長幼之節矣故父在斯爲子君在斯謂之臣  
居子與臣之節所以尊君親親也故學之爲父子焉學  
之爲君臣焉學之爲長幼焉父子君臣長幼之道得而

國治

學之音效

孔氏曰物猶事也一事謂與國人齒讓三善謂衆知  
父子知君臣知長幼也世子唯在學時與國人齒若  
朝會飲食則否國人謂不知禮者疑而發問也有父  
在則禮然者是知禮之人答之也父在則常須謙退



不敢居人之前故云父在則禮當如此父子天性自然故云道君臣以義合故云義長幼有等級上下故云節不言兄在則禮然而云長長者以世子無兄故也國人聞世子居臣子之禮於是各知尊其君父世子所以父在爲子禮君在爲臣禮也斯語辭也謂之臣者世子於君雖曰君臣異於義合也鄭氏曰學教也長樂陳氏曰知爲父子則孝知爲君臣則忠知爲長幼則順孝弟忠順立而國治矣方氏曰齒讓者序齒而相讓也父在斯爲子以其天合故直言爲君在斯謂之臣以其人合故止言謂之也內則父子外則君臣長幼則內外之所兼有也內外治則國其有不治者乎澄曰得者謂於父子君臣長幼之道無所失也

語曰樂正司業父師司成一有元良萬國以貞世子之

謂也

新安王氏曰樂正司案下文所謂大樂正授數是也父師司成所謂太傅少傅有保有師以成世子之德者也而鄭氏以爲司徒之屬師氏誤矣鄭氏曰司主也一一人也元大也良善也貞正也孔氏曰樂正主大子詩書之業父師成就其德行一人謂世子一人有大善則萬國以正也

○教世子

鄭氏曰亦題上事澄曰舊本錯簡在一獻無介語可也下

右記三王教世子之禮凡三節

凡學世子及學士必時

學世子學士並音效下並同

前章言教世子之法備矣此章兼言教士故於章首發凡并言二事鄭氏曰學士謂司徒論俊選所升於學者四時各有宜孔氏曰時謂四時即下春夏干戈春誦夏弦之類是也

春夏學干戈秋冬學羽籥皆於東序小樂正學干大胥贊之籥師學戈籥師丞贊之胥鼓南春誦夏弦大師詔之瞽宗秋學禮執禮者詔之冬讀書典書者詔之禮在

瞽宗書在上庠

大胥如字大師音泰大樂正同

鄭氏曰干盾也戈句子戟也干戈萬舞象武用春夏動作之時學之羽籥籥舞象文用秋冬安靜之時學之詩云左手執籥右手秉翟是也小樂正大胥籥師籥師丞皆樂官之屬通職秋冬亦學以羽籥小樂正

樂師也周禮樂師掌國學之政教國子小舞大胥掌  
學士之板以待致諸子春入學舍莩合舞秋頒樂合  
聲箎師掌教國子舞羽吹箎南南夷之樂也胥掌以  
六樂之會正舞位旋人教夷樂則以鼓節之詩云以  
雅以南以箎不僭是也春誦謂歌樂也夏弦謂以絲  
播詩陽用事則學之以聲陰用事則學之以事因時  
順氣於功易成也周立三代之學學書於有虞氏之  
學典謨之教所興也學舞於夏后氏之學文武中也  
學禮樂於殷之學功成治定與己同也孔氏曰萬舞  
用干故象武若其大舞則以干配戚明堂位朱干玉  
戚冕而舞大武是也若其小舞則周禮樂師帗舞干  
舞是也箎舞不用兵器故象文此箎師教戈周禮箎  
師掌教國子舞羽敔箎是箎師既教戈又教箎此小  
樂正教干周禮樂師教小舞則六舞皆教故知通職  
至秋冬之時亦教羽箎也此有大樂正小樂正而周  
禮有大司樂有樂師大樂正即大司樂小樂正即樂

師也周禮唯有籥師此云籥師丞者或諸侯之禮或異代之法胥謂大胥旄人教國子南夷樂之時大胥擊鼓以節南樂故云胥鼓南春夏學千戈秋冬學羽籥皆據年二十升於大學者於東序是大學也若其未升大學之時則春誦夏弦在殷之瞽宗也誦歌樂之篇章不以琴瑟也弦謂以琴瑟播詩之音節詩音即樂章也春夏是陽陽主清輕故學聲秋冬屬陰陰主體質故學事澄曰按詩云以雅以南謂詩之二雅二南也此云胥鼓南亦謂大胥以鼓而節二南之樂歌爾天台陳氏曰詩以南與雅合言南屬文明之方所謂治安之風也若以南爲夷樂安得如詩所謂不僭者哉

○凡祭與養老乞言合語之禮皆小樂正詔之於東序

鄭氏曰學以三者之威儀也養老乞言養老人之賢者因從乞善言可行者也合語謂鄉射鄉飲酒大射

燕射之屬也。鄉射記曰：古者於旅也，語孔氏曰：此一凡已三事也。三事皆有威儀，故小樂正詔告世子及學士於東序，合語者謂合會義理而語說也。祭未及養老，亦皆合語。故詩：楚茨論祭祀之事云：笑語卒獲，是祭有合語也。養老既乞言，自然合語。此先言祭與養老乞言，別云合語，則合語非祭與養老，故知是鄉射。鄉飲大射、燕射等旅酬之時，合語也。

大樂正學舞干戚，語說命乞言，皆大樂正授數大司成。

論說在東序

說如字論平聲又去聲

鄭氏曰：學以三者之義也。戚斧也。語說合語之說也。數篇數，孔氏曰：小樂正既教以三者之威儀，大樂正又教以三者之義理。學以干戚謂祭也。祭則舞干戚。語說謂合語也。命乞言者，大樂正命此世子及學士。

於老者而乞言也前云祭故養老乞言與祭相連序  
在合語之上此不言祭故畧其養老在語說之下千  
戚語說乞言三者皆大樂正之官授世子及學士等  
篇章之數也小樂正教威儀詔之東序大樂正授數  
亦在東序也新安王氏曰論說者即舞千戚語說乞  
言之數爲講論而詳說之上所謂千戈羽籥之舞  
弦誦之歌書禮之文無一不盡而非教者爲之論說  
則習其事不明其義誦讀其言不明其指歸與不學  
無異大司成所以在東序爲之論說也大司成即大  
司樂也不謂之大司樂而謂之大司成者以世子及  
國子之德業大司樂教之使成也澄按鄭注以大司  
成爲師氏考之周官師氏雖爲教官之屬掌以德行  
教國子及以中失之事教國子第而凡貴遊子弟學  
焉然不言教於國學之中此章所記皆是國學之教  
大樂正即周官大司樂也大司樂掌建國之學政凡  
有道者有德者使教焉其下樂師亦掌國學之政大

胥小胥亦然所謂大司成疑王氏之說爲得蓋三者之禮皆由大樂正授以篇章之數小樂正依所授之數而教詔之教詔者其事也大樂正又爲之論說其理上章教世子則在學之時大樂正小樂正之教皆業也惟不在學時師傅保之薰陶涵養爲能成其德故曰父師司成此教國子俊選則大師與執禮者與典書者與小樂正等所詔亦業而已惟大司樂論說義理使之通曉開悟爲能成其德故以大司樂爲司成既言大樂正授數而又特言大司成論說蓋授數猶未離乎業於論說始可言成也成猶成於樂之成謂教之之至使其德周完全備無虧欠也

○凡侍坐於大司成者遠近間三席可以問終則負牆列事未盡不問



鄭氏曰間猶容也容三席則得指畫相分別也席之制廣三尺三寸三分所謂函丈也負牆却就後席相辟也列事未盡不問錯尊者之語不敬也孔氏曰此論國子侍坐於大司成之儀問終則起却就後席負牆而坐辟後來問者問事之時若尊者序列其事未終盡則不可錯亂尊者之語輒有咨問

○凡語于郊者必取賢斂才焉或以德進或以事舉或以言揚

鄭氏曰語謂論說於郊學大樂正論造士之秀者升諸司馬曰進士謂此孔氏曰取其賢者斂其才者以爵之德謂有德進謂爵之事謂解世事或吏治之屬舉謂用之言謂能言語應對堪爲使命揚亦進舉之類互言之也澄曰語謂合語郊謂郊學按王制不率教者自鄉移之郊自郊移之遂則郊學蓋在鄉學之

外遂學之內鄭氏以此爲大樂正論造士之秀而升諸司馬今按大樂正掌國學之教何爲出就鄉學疑是六遂之士已升於鄉學而可升於鄉學者鄉大夫就鄉學行鄉飲酒之禮於旅酬之時而合語因以審擇士之賢者才者而取斂之取賢謂以德進也斂才謂以事舉以言揚也曰進曰舉曰揚皆謂升之於鄉學也石林葉氏曰六鄉有庠六遂有序鄉則在鄉遂之間也自鄉而退者移於此則漸遠國中之教而有所改自遂而升者由於此則未見國中之教而有所慕

曲藝皆誓之以待又語三而一有焉乃進其等以其序

謂之郊人遠之於成均以及取爵於上尊也

遠之去聲

孔氏曰學士中雖無前三事而有曲藝皆且令謹習以待後語若春待秋時也三事若有一善乃進於衆

雖得進於衆猶不得同爲俊選名曰郊人言猶在郊學也澄曰曲謂一偏曲藝謂射御書數之屬誓蓋戒勵之使勉於學三即上文德與事言也士在郊學者有德行政事言語則進而舉揚之若但有一曲之藝而無是三者則勉之使學以待在後又語而考察之考察三者之中或有其一即進其品等於曲藝之上然所進非一人又自有高下爲先後之序也成均及取爵於上尊未詳鄭氏以成均爲天子之大學孔疏謂飲酒之禮尊者酌於堂上之尊卑者酌於堂下之尊蓋是鄉學之秀士已升於司徒爲選士者於天子視學飲酒之時亦得取爵於堂上之尊以相旅選士升於大學爲俊士者始得謂之成均之士今郊學又語之時曲藝者雖已進等然猶未升鄉學仍在郊學故但謂之郊人以明其未爲鄉學之士也視彼鄉學以選士得升於大學而爲成均之俊士者相去尚遠故曰遠之視彼秀士得升爲司徒之選士可以取爵

於上尊者相去亦尚遠故蒙上遠之二字而曰以及也

○始立學者既興器用幣然後釋菜不舞不授器乃退

饋于東序一獻無介語可也

典虛觀切  
饋必勿切

鄭氏曰謂天子命之教始立學官者也興當作釁字之誤也禮樂之器成則釁之用幣告先聖先師以器成又釋菜告先聖先師將用也釋菜禮輕釋奠則舞舞則授器司馬之屬司兵司戈司盾祭祀授舞者兵也孔氏曰四時釋奠不及先聖此用幣釋菜及先聖者以始立學者必釋奠先聖先師此亦始立學及器成重於四時常奠也釋菜雖作樂不爲舞故不授舞者所執干戈之器大胥云春舍菜合舞彼謂欲合舞先釋菜非釋菜之時則合舞也釋菜虞庠而退乃饋禮其實於東序其禮既殺唯行一獻無介無語如此

於禮可也諸侯唯立時王之學此云東序謂諸侯有功德若魯得立三代學也熊氏云用幣則無菜用菜則無幣月令釋菜不及先聖者以其四時入學釋菜故不及先聖也王制釋奠于學注以爲釋菜奠幣彼是告祭之禮故謂釋奠亦不及先聖也凡釋奠有六始立學釋奠一也四時釋奠有四通前五也王制師還釋奠于學六也釋菜有三春入學釋菜合舞一也此釁器釋菜二也學記皮弁祭菜三也秋頒學合聲無釋菜之文則不釋菜也釋幣唯一即此釁器用幣是也廬陵胡氏曰儋禮其賓於東序唯一獻無介但語可也朱子曰語即上文合語之語言可也明釋菜時未可語禮尚嚴也

○凡始立學者必釋奠于先聖先師及行事必以幣

鄭氏曰釋奠者設薦饌酌奠而已無迎尸以下之事先聖周公若孔子孔氏曰諸侯始立學釋奠先聖先

師則天子亦然天子四時釋奠先師不及先聖則諸侯亦然立學重政及先聖常奠輕唯祭先師如立學用幣則四時奠不用幣也長樂陳氏曰四時釋奠止於先師始立學釋奠則及先聖者德之小者親而不尊故其祭數德之大者尊而不親故其祭疏宗廟天地之祭其疏數不同亦此意也

○凡學春官釋奠于其先師秋冬亦如之

鄭氏曰官謂禮樂詩書之官周禮曰凡有道者有德者使教焉死則以爲樂祖祭於瞽宗此謂先師之類若漢禮有高堂生樂有制氏詩有毛公書有伏生億可以爲之也不言夏夏從春可知孔氏曰凡學謂禮樂詩書之學官即所教之官也教書之官四時於虞庠釋奠先代明書之師教禮之官四時於瞽宗釋奠先代明禮之師若春誦夏弦則大師釋奠也教干戈則小樂正樂師等釋奠也教禮者則執禮之官釋奠

也其教雖各有時其釋奠則四時各學備而行之後  
世釋奠祭亡方氏曰釋奠止言三時而不及夏者絃  
誦一師夏則  
因春故也

○凡釋奠者必有合也有國故則否

劉氏曰合謂合樂也春釋菜合舞秋頒學合聲釋奠  
則并合之以侑神也有國故謂凶札師旅唯是不合  
朱子曰以下文考之有合當爲合樂國故當爲喪紀  
凶札之類長樂陳氏曰國有故則否與曲禮曰歲凶  
祭祀不  
縣同意

○凡大合樂必遂養老

鄭氏曰大合樂謂春入學合衆合舞秋頒學合聲是  
時天子則視學焉遂養老謂用其明日也鄉飲酒鄉

射之禮明日乃息司正徵唯所欲以告於先生君子可也是養老之象類孔氏曰周禮大胥春合舞秋合聲雖無天子視學之文而月令季春大合樂天子親往則知春合舞秋合聲之時天子亦親視學也長樂陳氏曰後言天子視學遂適東序養老則視學養老皆同日也鄭氏謂用其明日誤矣

天子視學大昕鼓徵所以警衆也

此所謂慮之以大也養老所以教孝弟徵召衆學士皆至欲使人人知孝弟之行也孔氏曰天子視學謂仲春合舞季春合樂仲秋合聲大昕者大猶初也凡物初爲大末爲小昕猶明也謂視學之晨徵猶召也昕明擊鼓警動衆人令起鄭氏曰早昧爽擊鼓以召衆也警猶起也周禮凡用樂大胥以鼓徵學士

衆至然後天子至乃命有司行事興秩節祭先師先聖



焉

此所謂愛之以敬也。孔氏曰：衆至謂衆人聞鼓聲而起，先至會聚之處，然後天子始至，尊者體盤故也。天子既至，乃命有司行釋奠之事，有司卽詩書禮樂之教官也。于時天子視學在虞庠中，鄭氏曰：興猶舉也。秩常也，節猶禮也。使有司舉常禮祭先師先聖，不親祭之者，視學觀禮爾，非爲彼報也。

有司卒事反命始之養也。適東序釋奠於先老，遂設三

老五更羣老之席位焉。

更江  
衡切

此所謂行之以禮也。鄭氏曰：卒事反命告祭畢也。祭畢，天子乃入，又之養老之處也。凡大合樂必遂養老，是以往焉於先老親奠之者，已有所事也。三老五更各一人，名以三五者，取象三辰五星，皆年老更事致

仕者也天子以父兄養之示天下孝弟也羣老無數其禮亡以鄉飲酒言之則席位之處三老如賓五更如介羣老如衆賓也孔氏曰天子既視學畢適之東序養老處親自釋奠於先世之老祀先老畢遂於東序中設三老五更羣老之席位蔡邕以更字爲叟叟老稱又以三老爲三人五更爲五人

適饌省醴養老之珍具遂發咏焉退修之以孝養也

養

尚切下  
孝養同

此所謂修之以孝養也鄭氏曰適饌省醴親視其所  
有也發咏謂以樂納之退修之謂既迎而入獻之以  
醴獻畢而饗闕孔氏曰布席既畢天子親適陳饌之  
處省視醴酒并其珍具出迎三老五更將入門之時  
遂作樂發其歌咏以納之也三老五更即位於西  
階下天子乃退酌醴獻之以修行孝養之道也

反登歌清廟既歌而語以成之也言父子君臣長幼之道合德音之致禮之大者也下管象舞太武大合衆以事達有神興有德也正君臣之位貴賤之等焉而上下之義行矣

此所謂紀之以義也鄭氏曰反謂獻羣老畢皆升就席也反就席乃席工於西階上歌清廟以樂之既歌謂樂正告正歌備也語談說也歌備而旅旅而說父子君臣長幼之道說合樂之所美以成其意鄉射記曰古者於旅也語象周武王伐紂之樂也以管籥其聲又爲之舞皆於堂下衆謂所合學士也達有神明授命周家之有神也興有德美文王武王有德也上下之義由清廟與武孔氏曰反謂反席三老五更羣

老初受獻畢皆立於西階下東面今皆反升就席清廟之詩美文王有君臣父子長幼之德旅之時論說君臣父子長幼之道會合清廟所美之事以成就其升歌清廟之意也德音謂清廟之詩是文王道德之音致極也下管象舞大武者登歌之後笙入立于堂下管中奏此象武之曲庭中舞此大武之舞大武即象也按詩維清奏象舞是武王作樂稱象也大會聚學士以舞象之事明周之有神有德也登歌清廟文王詩也君詩在上下管象武王詩也臣詩在下是正君臣之位貴賤之等以此教上下衆知之是上下之義行於衆庶也澄曰絃以歌清廟之詩堂上之樂也既歌以下釋堂上用樂之意蓋清廟之詩是美文王有聖德能盡人倫之道歌詩既畢行旅酬禮乞言於老而老者有語其語皆是言父子君臣長幼之道與清廟詩所美文王德音之極致相協合語及於此乃禮之最大者管以節大武之舞堂下之樂也合大衆

以下釋堂下用樂之意蓋大武之舞是象武王有武德能受天命之事大合衆士以此事使咸知周家有天神之眷佑武王有盛德以代商也達謂通達使人知之興謂興起使人見之正君臣之位貴賤之等以明上下之義又總釋堂上堂下之樂也

有司告以樂闋王乃命公侯伯子男及羣吏曰反養老幼于東序終之以仁也

鄭氏曰闋終也所告者謂無算樂羣吏鄉遂之官王於燕之末而命諸侯時朝會在此者各反養老如此禮是終其仁心孝經說所謂諸侯歸各帥於國大夫勤於朝州里驢於邑是也孔氏曰諸侯為畿外羣吏謂畿內王自養老是仁恩也又令諸侯州里養老如王家之禮是終竟其仁心也驢謂希驢仰慕行之長

樂陳氏曰言養老不及幼及命諸侯羣吏則兼幼言之者耆老孤子先王未嘗不兼養然其所重特老者而已

是故聖人之記事也慮之以大愛之以敬行之以禮修之以孝養紀之以義終之以仁是故古之人一舉事而衆皆知其德之備也古之君子舉大事必慎其終始而衆安得不喻焉兌命曰念終始典于學

悅音

記事謂叙記故事遵從古人所行而行養老之禮也慮謂圖謀之始養老以教孝弟於其始而徵召衆士無一不至使知之所者廣博是不狹少也故曰慮之以大老人者君之所取法先師先聖又老人之所取法愛其道則敬其人將養老而釋奠于先師先聖敬所本也故曰愛之以敬適養老之所首祀先老繼設席

伍養老之時行此二者之禮最在先故曰行之以禮  
修謂整飭無欠缺具滋味以致其愛躬省視以致其  
敬發咏於其入以悅其耳獻醴於其位以悅其口一  
如人子養親之孝故曰修之以孝養堂上堂下之樂  
相繼而作使人知君父之貴其樂在上臣子之賤其  
樂在下由是而衆著于上下之義故曰紀之以義養  
老禮終又命諸侯羣吏各歸養老幼於其國邑以廣  
仁恩故曰終之以仁古人舉此養老之一事而六者  
之美德悉備處之以大者知所先知所重智也敬出  
於禮孝養出於仁此五常之德也不言信者實有此  
六德卽信也孔氏曰一舉養老之事以示天下而衆  
皆知在上之德備具其備具者卽處之以大而下是  
也慮之以大是慎其始終之以仁是慎其終養老之  
事既慎其終始一一露見盡以示衆則衆何得不曉  
喻焉養老而在下衆庶知道德之備其在學乎鄭氏  
曰喻猶曉也允當爲說說命書篇名殷高宗之臣傅

說所作典常也念事之終始常於學學禮義之府登按說命所云學習之學此記所引借爲學宮之學蓋此章所記自教世子及學士以至養老皆學中之禮也

右記學禮凡九節

庶子之正於公族者教之以孝弟睦友子愛明父子之義長幼之序

此總下文七者之目也鄭氏曰庶子司馬之屬掌國子之倅爲政於公族者正者政也長樂劉氏曰立官掌其宗族之政治孔氏曰周禮諸子下大夫二人諸侯謂之庶子職掌與諸子同山陰陸氏曰周官所謂諸子即此庶子燕義曰古者周天子之官有庶子官職諸侯卿大夫士之庶子之倅先儒謂庶子諸侯之



官誤矣廬陵胡氏曰正謂公族之所取正長樂陳氏曰庶子正公族教之事乎上則以孝弟教之交乎傍則以睦友教之恤乎下則以子愛澄曰善事親之孝即父子之義也善事兄之弟即長幼之序也睦友子愛皆孝弟之推睦者和於族友者和於弟子者慈於子愛者慈於幼或云子讀爲慈

其朝于公內朝則東面北上臣有貴者以齒庶子治之

雖有三命不踰父兄其在外朝則以官司士爲之朝音潮

此目之第一條也鄭氏曰內朝路寢庭治之治公族之禮也唯於內朝則然其餘會聚之事則與庶姓同外朝路寢門外之外庭司士亦司馬之屬也掌羣臣之班正朝儀之位也孔氏曰公族若朝於公之內朝則西方東面北上皆同姓之人不得踰越父兄謂以昭穆長幼爲齒父兄雖賤而在上子弟雖貴而處下

庶子治之謂治此公族朝於內朝之時不計官之大  
小故雖有三命之貴而列位不得踰越在無爵父兄  
之上其餘非內朝則並計官也此內朝庶子治之其  
外朝則司士爲之也公族朝於外朝與異姓同處其  
位次則以官之上下不以齒也按周禮司士掌路寢  
門外之朝對路寢庭朝爲外朝若對庫門外朝朝士  
所掌三槐九棘之朝則此路門外朝亦爲內朝也其  
朝位天子之朝三公北面東上卿大夫西面北上其  
士門西東面北上若諸侯之朝按大射卿西面北上  
大夫北面東上士門西東面北上與天子不同方氏  
曰庶子言治之司士言爲之治上道也爲下道  
也山陰陸氏曰治之者以義爲之者以禮也

其在宗廟之中則如外朝之位宗人授事以爵以官其  
登餼獻受爵則以上嗣

此目之第二條也鄭氏曰宗人掌禮及宗廟也以爵貴賤異位也以官官各有所掌也若司徒奉牛司馬奉羊司空奉豕上嗣君之嫡長子以特牲饋食禮言之受爵謂上嗣舉奠也獻謂舉奠洗爵酌入也餞謂宗人遣舉奠盥祝命之餞也大夫之嗣無此禮辟君也孔氏曰公族若在宗廟之中則其五位如外朝之位宗人授百官之事隨爵之尊卑貴者在前賤者在後又以官之職掌各供其事按周禮司徒奉牛牲司馬奉羊牲五行傳牛屬土雞屬木羊屬火犬屬金豕屬水司空冬官位屬水故奉豕又按周禮雞人屬宗伯羊人屬司馬犬人屬司寇據諸侯三卿言之故不云雞犬也其登餞獻受爵不用衆官唯用上嗣按特牲禮尸食之後主人主婦賓長等獻尸三獻禮畢主人獻賓及獻衆賓畢主人酬賓賓奠不舉主人獻長兄弟及獻衆兄弟內兄弟等訖長兄弟洗觚酌尸爲加爵衆賓長又加爵畢嗣子乃舉奠奠者初尸未入

之前祝酌奠於劍南尸入祭奠不飲至此乃嗣子舉之必嗣子舉奠者將傳重累之也大夫之嗣子不舉奠則此舉奠唯天子諸侯及士之子禮爾特牲又云嗣舉奠盥入北面再拜稽首尸執奠嗣子進受復位再拜稽首尸答拜嗣子卒解拜尸尸答拜所謂受爵也又云嗣舉奠洗酌入尸拜受嗣子答拜所謂獻也又無筭爵之後禮畢尸謾而出宗人遣嗣子及長兄弟相對而餞所謂餞也特牲禮之所言先受爵而後獻獻而後餞今此記先云餞者以餞爲重舉重者從後向先逆言之也登謂登堂無事之時嗣子在堂下餞時登堂獻時亦登堂受爵之時亦登堂此一登之文包此三事也餞時雖有長兄弟以上嗣爲主

其公大事則以其喪服之精麤爲序雖於公族之喪亦如之以次主人

此日之第三條也鄭氏曰大事謂死喪其爲君雖皆  
斬衰序之必以本親也主人主喪者次主人明主人  
恒在上主人雖有父兄猶不得下齒孔氏曰此謂君  
喪而庶子官掌之事也按喪服君爲臣雖皆斬衰其  
庶子列次之時則以其本服之精麤爲序衰麤者在  
前衰精者在後精麤謂衰服縷布精麤也非但公喪  
如此雖於公族之內有死喪之事相爲亦如之爲死  
者服麤者居前服精者居後雖有庶長父兄等於主  
人仍次於主人之下使主人在上居喪主也方氏曰  
送死足以當大事故謂之大事服輕則於喪者爲疏  
服重則於喪者爲親以精麤爲序也

若公與族燕則異姓爲賓膳宰爲主人公與父兄齒族  
食世降一等

此日之第四條也鄭氏曰異姓爲賓爲同宗無相賓客之道膳宰爲主人君尊不獻酒也與父兄齒親親也族食世降一等親者稠疏者希孔氏曰此明公與族人燕食之禮庶子掌之也燕飲必立賓以行禮異姓爲賓必對主人君尊不宜敵賓故使供膳之宰以爲主人使得抗禮酬酢也公既不爲主族人又不爲賓故列位在父兄之坐上與族人相齒見親親也族食謂與族人燕食也族人既有親疏燕食亦隨世降殺假令本是齊衰一年四會食若大功則一年三會食小功則一年二會食總麻則一年一會食是世降一等也若與異姓燕飲則宰夫爲膳主

其在軍則守於公禰公若有出疆之政庶子以公族之無事者守於公宮正室守大廟諸父守貴宮貴室諸子

# 諸孫守下宮下室

此目之第五條也鄭氏曰在軍謂從軍者公禰行主也  
行以遷主言禰在外親也出疆謂朝覲會同也正室適子也  
大廟大祖之廟孔氏曰此明庶子從行在軍及公行庶子  
留守之事公禰謂遷主載在齊車隨公行者庶子官既從  
在軍故守於公齊車之行主也遷主而呼爲禰既在國外故  
依親親之辭若出軍庶子不從公行則掌留守云庶子以公  
族之無事者守於公宮與下文爲總正室守大廟以下則各  
言其別無事謂不從行及無職事者正室謂公卿大夫之適  
子諸父諸子諸孫亦謂卿大夫之諸父子孫也不云兄弟者  
諸兄從諸父諸弟從諸子也澄曰貴宮貴室下宮下室舊說  
不通按春秋傳諸侯之廟始祖稱大廟羣公稱宮則此貴宮  
蓋謂羣公之廟下宮謂羣公之下者昭穆四親廟稱貴宮親  
廟之外別立廟如魯

仲子之宮之類則稱下宮也宮統言室則以宮之中  
一室言也貴宮之室曰貴宮貴室下宮之室則曰下  
宮下室此後申釋前文但言貴室下室而不復言貴  
宮下宮可見宮與室之非二矣鄭注以貴宮貴室總  
爲路寢下宮爲親廟下室爲燕寢二貴則宮室混爲  
一二下則宮室分爲二又親廟貶稱下宮而但子孫  
守之路寢反稱貴宮而以諸父守之是尊己所居而  
卑祖禰也義殊未安方氏以貴宮貴室爲昭廟下宮  
下室爲穆廟昭穆等爾何乃尊昭而稱爲貴卑穆而  
稱爲下乎山陰陸氏以貴宮貴室若魯公廟下宮下  
室若羣公廟似矣然魯公廟寔僭倣周之文世室武  
世室他國無之又且四親廟豈可貶之而以下爲稱  
乎廬陵胡氏以貴宮下宮皆人所居貴室下室則親  
廟高祖以下亦未爲是蓋君出之時庶子官但以族  
人守宮廟而已若君之所居無容族人守之也公宮  
是總言大廟貴宮下宮五廟共爲都宮故總謂之公



也宮

五廟之孫祖廟未毀雖爲庶人冠取妻必告死必赴練祥則告族之相爲也宜弔不弔宜免不免有司罰之至

于昭賻承含皆有正焉

冠取相爲之爲並去聲賻芳鳳切賻音附承鄭讀爲贈含胡暗

切

此目之第六條也鄭氏曰赴告於君也實四廟孫而言五廟者容顯考爲始封子也弔謂六世以往免謂五世承讀爲贈聲之誤也正正禮也孔氏曰祖廟未毀謂同高祖高祖以下唯有四廟今云五廟容顯考爲始封子高祖爲四世其五世祖是始封之君自五世以下其廟不毀故爲五廟也從六世以至百世但

有弔禮四世同高祖有總麻之親五世則親盡但有袒免贈車馬賻財帛含珠玉縫衣服皆贈喪之物總謂之贈贈送也正謂庶子之官正之以禮使賵賻隨其親疏也澄曰按士喪禮含賻賵贈四者各有其禮贈謂贈以幣帛在將葬之時孔疏謂賵賻含縫總稱曰贈非也長樂陳氏承讀如字不改爲贈而曰實於口者謂之含承於身者謂之承凡玉可以爲渠眉䟽壁者皆水也亦未見其勝於舊說

公族其有死罪則磬于甸人其刑罪則纖剝亦告于甸人獄成有司讞于公其死罪則曰某之罪在大辟其刑罪則曰某之罪在小辟公曰宥之有司又曰在辟公又曰宥之有司又曰在辟及三宥不對走出致刑于甸人

公又使人追之曰雖然必赦之有司對曰無及也反命

于公公素服不舉爲之變如其倫之喪無服親哭之公

族無宮刑

甸大通切纖讀爲殲又之林切又子康切告讀爲鞠讞魚列切辟婢亦切爲之云僞切

此目之第七條也長樂陳氏曰公之於族示之以孝悌睦友子愛之道所以教其善示之以廟朝之禮所以教其敬示之以喪服之禮所以教其哀示之以燕食之禮所以致其親示之以宮室之守所以教其忠示之以赴告弔免所以教其義教之已盡而猶犯焉然後隨之以刑可也其死罪則縊之於甸人其刑罪則纖剝者亦告於甸人不忍與衆棄之也必於甸人者以甸人共祭薦之物故也鄭氏曰縣縊殺之曰磔面人掌郊野之官不於市朝者隱之也纖讀爲殲纖刺也剝割也宮割臙墨剝削皆以刀鋸刺割人體也

告讀爲鞠讀書用法曰鞠成平也獻之言白也辟亦  
罪也有寬也欲寬其罪出於刑也又復也對答也先  
者君每言宥則答之以將更寬之至於三罪定不復  
答走往刑之爲君之恩無已也罪既正不可宥公又  
使人追之曰必赦之重刑殺其類也反命白已刑殺  
也素服於凶事爲吉於吉事爲凶非喪服也君雖不  
服臣卿大夫死則皮弁錫衰以居往弔當事則弁經  
於士蓋疑衰同姓則總麻以弔之今無服者不往弔  
也倫謂親疏之比也素服亦皮弁矣親哭之者不往  
弔爲位哭之而已君於臣使有司哭之澄曰鞠窮治  
也孔氏曰獄成謂獄斷既平定其罪狀也公又使人  
追之謂追止行刑殺之人曰雖重罪如是必更寬宥  
赦其刑殺也素服不舉饌食爲之變其常禮如其親  
疏倫輩之喪身不往弔無弔服也此素服衣裳皆素  
凶事用布今用素爲吉吉時皮弁服白布衣素積裳  
以采爲領緣今衣裳皆素爲凶非如喪服五服之限

云素服不言素冠故知亦皮弁公族雖犯宮刑不行  
宮刑但髡去其髮廬陵胡氏曰有司又曰在辟以示  
後世臣執法宜堅其君用刑宜寬及三宥不對走出  
致刑于甸人春秋傳曰臣義而行不待命者此也程  
子曰如其倫之喪無服明無罪者有服也朱子曰此  
素服下脫居外不聽樂五字親哭之下脫於異姓之  
廟五字當補之

公族朝于內朝內親也雖有貴者以齒明父子也外朝  
以官體異姓也

長樂劉氏曰作記者既載文王周公所行之法于前  
自此至不翦其類也又以其意解釋朕義于後孔氏  
曰內親欲使親在其內也故於內朝雖貴猶與賤者  
計年以爲齒列者欲明父子昭穆之本恩故也若族

人在外朝則不復計年以官爲次蓋外朝主尊別不得以私恩爲異方氏曰體謂與之爲一體與後體百姓之體同澄曰此

覆釋目之第一條

宗廟之中以爵爲位崇德也宗人授事以官尊賢也登餽受爵以上嗣尊祖之道也

鄭氏曰崇高也授事以官官各有能也上嗣祖之正統孔氏曰廟中行禮是先祖尊嚴之所所主在德故列爵爲位是崇有德也官由賢能而興今欲尊崇此賢故授事以表之也適子先祖之正體故使受爵於尸及升餽尸饌是尊祖之道理也方氏曰宗廟之中序爵以辨貴賤爵不踰德故謂之崇德序事以辨賢否授事以官故謂之尊賢上文言獻受爵此止言受爵以上見之也解上文或此略而彼詳或此詳而彼

略義皆放此澄曰德謂有德賢謂優於其事此覆釋目之第二條

# 喪紀以服之輕重爲序不奪人親也

方氏曰喪在彼也而我以禮數紀之謂之喪紀奪者對予之名不奪則予之使無失其爲親也孔氏曰不計爵之尊卑以服之本輕者爲下本重者爲上是不奪人本親之恩澄曰此覆釋目之第三條

# 公與族燕則以齒而孝弟之道達矣其族食世降一等

# 親親之殺也

殺色戒切

鄭氏曰以至尊不自異於親之列殺差也孔氏曰公降已尊而與族人燕會齒列則民有親屬者不相遺弃是使孝弟之道通達於下也近者食稠遠者食希是殺也方氏曰君與族燕以齒則不敢以君之位而

加於父兄然親親不可以無殺故世降一等焉澄曰此覆釋目之第四條

戰則守於公禰孝愛之深也正室守大廟尊宗室而君臣之道著矣諸父諸兄守貴室子弟守下室而讓道達矣

鄭氏曰上言父子孫此言兄弟互相備也行主君父之象孔氏曰在軍載主以行示不自專使庶子官主守而尊之此是孝愛之深適子是宗室之正大廟是祖之正使適子守大廟是尊宗廟之室臣下不敢以庶賤之人守君所重是君臣之道著明也貴者守貴賤者守賤賤者讓於貴者不相陵犯是讓道達也澄曰此覆釋目之第五條



五廟之孫祖廟未毀雖及庶人冠取妻必告死必赴不忘親也親未絕而列於庶人賤無能也敬弔臨賻賵睦友之道也

孔氏曰君不以貴仍統於親故族人有事告赴是不忘親也既與君有親何得爲庶人蓋賤其無能也君敬重弔臨賻賵不使闕失者是親睦和友之道也澄曰此覆釋目之第六條

古者庶子之官治而邦國有倫邦國有倫而衆鄉方矣

鄉許亮切

方氏曰如上所言皆庶子之官所治也凡言邦國者諸侯之國也倫者先後不可亂之謂方者道之方也

鄭氏曰鄉方言知所鄉孔氏曰此合結庶子官之義而先結於此者以邦國之功不宜與罪惡相連也澄曰七者之目方釋其六而先以此總結之然後別釋第七條之目于后者以刑殺其親非美事故雜而言之也

公族之罪雖親不以犯有司正術也所以體百姓也刑于隱者不與國人慮兄弟也弗弔弗爲服哭于異姓之廟爲忝祖遠之也素服居外不聽樂私喪之也骨肉之親無絕也公族無宮刑不翦其類也

爲服爲忝祖並云  
僞切遠之去聲

鄭氏曰犯猶干也術法也孔氏曰國立有司以法齊治一切今不可以私親之罪而壞有司之正法雖公

族之親猶治之與百姓爲一體故曰所以體百姓也  
異姓刑之於市同姓刑於甸師隱僻之處者不與國  
人謀慮兄弟也弗弔弗服哭於異姓之廟爲其犯罪  
忝辱先祖故遠之也素服居外以其實是已親私心  
喪之也所以然者骨肉之親無斷絕之理故也方氏  
曰有司以正法行故無貴賤親疎之間苟以公族之  
故乃欲奸有司使獲免焉則法失其正矣故曰雖親  
不以犯有司正術也刑于隱則非與衆棄之矣故曰  
不與國人慮兄弟也公族不止於兄弟特舉中以該  
上下爾素服居外不聽樂則以哀未忘也遠之者公  
義也哀未忘則有私愛存焉故曰私喪之也夫有生  
所以傳類而宮刑則無生之道焉故公族無宮刑澄  
曰此覆釋目  
之第七條

## 右記族禮凡一節

禮記纂言卷八

欽定四庫全書

禮記纂言卷九

元 吳澄 撰

明堂位

按大戴記明堂篇云明堂者天子之路寢也又云或以為明堂者文王之廟也按諸家論明堂紛紜不一更無定說雖大戴所記一篇之內自為異同而惟此兩節近是故特取之大凡寢廟之制皆前堂後室前堂向明故曰明堂天子有三朝而燕朝在路寢之明堂每日退朝聽政之所不於此見諸侯秋冬諸侯來朝天子在大廟之明堂負宸而立若此篇所記諸侯朝位蓋周公營洛邑時制為此禮大朝享則於洛邑文王廟之明堂受之也

昔者周公朝諸侯于明堂之位天子負斧依南鄉而立

朝音潮下同依於豈切鄉去聲

考之書周公相成王伐奄而歸四國多方之諸侯皆至宗廟周公代成王誥諸侯而有多方之書蓋成王之三年也及成王七年之三月周公制禮作樂之事備乃會侯甸男采衛五服之諸侯營洛邑其時王不在洛諸侯以侯國會王朝三公之禮見周公而已此外則不見周公代王受諸侯之朝此記言周公朝諸侯于明堂之位蓋是周公制作之時定此朝位天子謂王也舊注謂周公攝王位朝諸侯非也鄭氏曰負之言背也斧依爲斧文屏風於戶牖之間陳氏曰周公之東征也稱王命然後往其居東也侯王察已然後復周公事成王如此孰謂代之而受朝乎代之之說始於荀卿成於漢儒誤矣

三公中階之前北面東上諸侯之位阼階之東西面北上諸伯之國西階之西東面北上諸子之國門東北面東上諸男之國門西北面東上

此中國五等諸侯朝位在門內馬氏曰三公尊故其位立於中階之前東方陽也尊者居之西方陰也卑者居之侯尊伯卑故侯立阼階之東西面伯立西階之西東面俱北上取其近天子也諸子又卑於伯故位於門東北面諸男又次於子故位於門西北面俱東上者其上禮與三公同也陸氏佃曰孟子言周室班爵祿天子一位公一位侯一位伯一位子男同一位凡五等此書謂之明堂位正言其位也天子負斧依南鄉而立所謂天子一位也三公中階之前北面東上所謂公一位也諸侯阼階之東西面北上諸伯

西階之西東面北上所謂侯一位伯一位也諸子門  
東北面東上諸男門西北面東上所謂子男同一位  
也蓋子男之位同在國門而卿皆北面東上則其爲  
位不異矣陳氏曰周禮治朝之位孤東面卿大夫西  
面外朝之位左孤卿右公侯伯子男射人孤東面卿  
大夫西面皆尚右東西面者皆尚北路門之左右者  
皆尚中而明堂位諸侯西面諸伯東面則不尚右在  
門東西者東上則不尚中在西門之外者東面南上  
則不  
尚北

九夷之國東門之外西面北上八蠻之國南門之外北  
面東上六戎之國西門之外東面南上五狄之國北門  
之外南面東上九采之國應門之外北面東上四塞世



告至

塞先代切  
又先則切

此四夷遠國朝位在門外皇氏曰九夷在東門外之  
南故北土八蠻在南門外之西故東土六戎在西門  
外之北故南土五狄在北門外之西故東土九采在  
應門外之西也孔氏曰按職方云四夷八蠻七閩九  
貉五戎六狄爾雅云九夷八狄七戎六蠻謂之四海  
數不同者文異爾九州之外夷狄爲四方蕃塞每世  
一至或新王卽位或己君初卽位皆來朝也陸氏曰  
九采之國所謂要服荒服歟四塞卽九夷八蠻六戎  
五狄也鄭氏曰周禮侯服歲一見甸服二歲一見男  
服三歲一見采服四歲一見衛服五歲一見要服六  
歲一見九州之外謂之蕃國世一見九采九州之牧  
典貢職者二伯帥諸侯而入九牧居外而糾察之四  
塞謂夷服鎮服蕃服在四方爲蔽塞者新君卽位則  
朝新安王氏曰周官侯服外有甸服男服采服衛服

衛服外乃有蠻服夷服鎮服蕃服周官所謂六年五服一朝者侯甸男采衛也作洛之役稱侯甸男邦采衛見士於周皆不及蠻夷而采服諸侯與焉今夷蠻戎狄之國在宮門外九采之國反在應門外鄭說曰九采九州之牧何所據而爲此說也周官職方有蠻服夷服而無戎狄之服大行人之職衛服之外有要服而無蠻服鄭曰要服卽蠻服要服之外謂之蕃國世一見又曰蕃國夷服鎮服蕃服也今明堂位蠻夷戎狄並在門外而夷服鎮服蕃服又在蠻夷戎狄之外謂之四塞記之所言已自可疑鄭注其可信乎

此周公明堂之位也明堂也者明諸侯之尊卑也

此總結上文因釋明字之義然明者取南鄉光明之義曰明諸侯尊卑者非也按以上所言門內門外朝位於他書俱無證據殆難盡信蓋此篇意在夸大魯國得用天子禮樂遂推原其由而夸大周公所言多

非其實

右記明堂諸侯朝位

昔殷紂亂天下脯鬼侯以饗諸侯是以周公相武王以

伐紂

相去聲

鄭氏曰脯鬼侯謂以人肉爲薦羞惡之甚也孔氏曰周本紀鬼侯作九侯方氏曰紂之亂不止於脯鬼侯蓋舉其甚者以明武王之所以伐也陸氏曰孟子言伊尹說湯以伐夏救民而書序謂伊尹相湯伐桀以伊尹主伐事也孟子言周公相武王誅紂而此記謂周公相武王以伐紂以周公主伐事也

武王崩成王幼弱周公踐天子之位以治天下六年朝

諸侯於明堂制禮作樂頒度量而天下大服七年致政

於成王

量去聲

孔氏曰家語云武王崩成王年十三鄭康成以爲年十歲陸氏曰成王諒闇百官總己以聽周公自其常禮及喪畢成王尚幼是以周公權宜踐天子之位制禮作樂也鄭氏曰踐猶履也頒讀爲班度謂丈尺高卑廣狹也量謂豆區斗斛筥筭所容受也方氏曰所頒有規矩權衡準繩不止於度量止以二者爲言何也蓋分寸丈尺引以度長短謂之五度其形起於壁羨而禮寓之矣侖合升斗斛以量多少謂之五量具聲中於黃鍾而樂寓之矣度量者主乎禮樂而言也澄曰踐天子之位者但謂攝天子之事爾非謂真居天子之位也六年者蓋周公攝政之六年成王之七年也是年營洛邑七年者周公自成王二年之秋始

攝政至成王八年則爲七年也蓋成王初喪周公時  
爲冢宰旋遭流言之謗遂出東征而二公在朝行冢  
宰事成王元年周公居東之二年也殷亂平成王二  
年周公居東之三年也其秋有風雷之變而成王迎  
周公以歸周公既歸仍以冢宰攝天子事成王喪畢  
於常禮宜自親政矣以年尚幼弱故周公攝事如故  
及制禮作樂之事大備營洛邑以朝諸侯周公乃留  
治洛邑是年冬成王在洛烝祭八年之初自洛歸于  
宗周始自親政是爲周  
公致政於成王之年也

成王以周公爲有勲勞於天下是以封周公於曲阜地

方七百里革車千乘

乘繩  
證切

考之史記封周公於曲阜者武王也但周公雖已受  
封而不之國武王崩淮夷徐戎與武庚同叛故周公

東征而遣伯禽就國以遇徐戎詩所謂王曰叔父建爾元子俾侯于魯者蓋言成王命伯禽代周公往侯魯國爾非謂其時始受封也孟子曰周公之封於魯也地非不足而儉於百里其後定制諸侯之地方四百里乃是周公制作禮樂時事蓋除王所食之外有方百里之國有方百里之鄙并附庸二十六國爲方四百里此記所云地方七百里者夸大之辭非其實也况周公受封在武王克商之後魯公就國亦在武王初喪之時今此乃云成王以周公爲有勲勞於天下然後封之於曲阜而有方七百里之地妄矣方百里則有輕重車凡千乘

命魯公世世祀周公以天子之禮樂

此周公既薨成王思報周公之勲勞而有此命也意在尊崇周公而不知其非禮故夫子歎之曰周公其

衰矣而程子亦云成王之賜伯禽之受皆非也作此記者方且夸大之以爲美談甚矣其昧於禮義矣

是以魯君孟春乘大路載弧韠旂十有二旒日月之章

祀帝于郊配以后稷天子之禮也

韠音獨

鄭氏曰大路殷之祭天車也弧旌旗所以張幅也其衣曰韠天子之旌旗畫日月孔氏曰祭天尚質大路一就尊敬周公故用先代殷禮牲用殷白牡車乘殷大路也弧以竹爲之其形爲弓以張繆之幅此弓衣謂之韠方氏曰周官司常日月爲常交龍爲旂此言日月之章謂之載常可也乃謂載旂者常謂之旂猶公侯伯子男通謂之諸侯歟且王載大常諸侯載旂魯公以諸侯而用天子之禮故雖有日月之章而止謂之旂焉亦降殺之微意也新安王氏曰周天子有日至之郊以報本有啓蟄之郊以祈穀具祭天車用

玉路旗用日月之常魯僭天子禮亦不敢盡同是以  
有所穀之郊無日至之郊祈穀於孟春郊而後耕則  
孟春乃建寅之月非建子也不敢乘天子玉路又不  
肯乘同姓金路故乘殷之大路常畫日月天子建之  
旂畫交龍同姓諸侯建之常十有二旒旂則九旒而  
已今不敢全用天子之旂故於旂上畫日月之章綴  
以十有二旒此皆用天  
子禮而不敢盡同也

季夏六月以禘禮祀周公於大廟牲用白牡尊用犧象  
山罍鬱尊用黃目灌用玉瓚大圭薦用玉豆雕篋爵用  
玉琖仍雕加以璧散璧角俎用梡歲升歌清廟下管象  
朱干玉戚冕而舞大武皮弁素積裼而舞大夏昧東夷



之樂也任南蠻之樂也納夷蠻之樂於大廟言廣魯於

天下也

大廟音泰後同犧如字舊素何切壘音雷瓚才旦切簋祖管切又酸上聲琬音欵巖居衛切任

而林切

鄭氏曰禘大祭也周公曰大廟魯公曰世室羣公稱宮曰牡殷牲也尊酒器也犧象爵之器也黃彝也灌酌鬱尊以獻也瓚形如槃容五升以大圭爲柄是謂圭瓚簋籩屬也以竹爲之雕刻飾其直者也爵君所進於尸也仍因也因爵之形爲之飾也加加爵也散角皆以璧飾其口也琬始有四足也巖爲之距清廟周頌也象謂周頌武也以管播之朱干赤大盾也戚斧也冕冠名也諸公之服自衮冕而下如王之服也大武周舞也大夏夏舞也周禮敎師掌敎敎樂廣大也孔氏曰牲用白牡者尊敬周公不用己代之牲

故用殷牲尊用犧象山罍者用天子之尊也犧尊也周禮春夏之祭朝踐堂上薦血腥時用以盛醴齊君及夫人所酌以獻尸也象尊也周禮春夏之祭堂上薦朝事竟尸入室饋食時用以盛盎齊君及夫人所酌以獻尸也山罍謂夏后氏之尊天子於追享朝享之祭再獻所用今褒崇周公於禘祭雜用山尊不知何節所用也罍尊用黃目者罍謂罍也酒黃目嘗烝所用尊崇周公於夏禘用之灌用玉瓚大圭者灌謂酌罍也獻尸求神也以玉飾瓚故曰玉瓚薦用玉豆者謂所薦菹醢之屬以玉飾豆故曰玉豆簋形似筥亦薦時所用簋用竹不可刻飾故雕鏤其柄也爵用玉琖仍雕者爵君酌酒獻尸杯也琖夏后氏爵名以玉飾故曰玉琖加以璧散璧角者加謂尸入室饋食竟夫人酌盎齊亞獻名爲再獻又名爲加以其非正獻故謂之加于時薦加籩加豆也此時夫人用璧角內宰所謂瑤爵也瑤是玉名璧是玉之形制爵

是總號角是爵之所受名異而實一也其璧散者夫人再獻訖諸侯爲賓用之以獻尸雖非正加是夫人加爵之後故此總稱加先散後角便文也俎用梲巖兩代俎也虞俎名梲禮圖云梲長二尺四寸廣一尺二寸高一尺夏俎名巖亦如梲直有脚曰梲虞氏尚質未有餘飾也加脚中央橫木曰巖夏氏漸文故也升升堂也升樂工於廟堂而歌清廟詩也下堂下也管匏竹在堂下故云下管堂下吹管以播象武之詩也朱干玉戚者赤盾而玉飾斧也冕而舞大武者王著袞冕執赤盾玉斧而舞武王伐紂之樂也上云下管象謂吹大武詩此云舞大武謂爲大武之舞也皮弁三王之服裼見美也大夏夏禹之樂也王又服皮弁裼而舞夏后氏之樂也六冕是周制故用冕而舞周樂皮弁是三王服改用皮弁舞夏樂也周樂是武武質故不裼夏家樂文故裼也若諸侯之祭各服所祭之冕而舞祭統冕而總干以樂皇尸是也周公德

廣非唯用四代之樂亦爲蠻夷所歸故賜奏蠻夷之樂於庭也唯言夷蠻則戎狄可知或云正樂旣不得六代故蠻夷唯與二方也納夷蠻之樂皆於大廟奏之者廣魯欲使如天子示於天下也

君卷冕立于阼夫人副禕立于房中君肉袒迎牲于門夫人薦豆籩卿大夫贊君命婦贊夫人各揚其職百官

廢職服大刑而天下大服

卷音哀  
禕音輝

孔氏曰前明祀周公所用器物此明祀周公之時君與夫人卿大夫命婦行禮之儀尸初入之時君待於阼階夫人立於東房中副王后首飾以其覆被頭首禕衣后服之上者迎牲于門謂裸鬯之後牲入之時迎於門也夫人薦豆籩者朝踐及饋孰并醑尸之時也卿大夫助君謂初迎牲幣告及終祭也命婦助夫

人謂薦豆籩及祭事之屬當祭之時命百官各揚舉其職如有廢職不供服之以大刑以此祭周公文物備具禮儀整肅百官供命而天下大服明周公之德宜合如此鄭氏曰副禕王后之服唯魯及王者之後夫人服之諸侯夫人則自揄翟而下贊佐也命婦於內則世婦也於外則大夫之妻也祭祀世婦以下佐夫人揚舉也大刑重罪也天下大服知周公之德宜饗此也澄曰服大刑謂以大刑加於其身也大服者天下之人見周公饗此盛祭皆以爲當然無不心服也輔氏曰周公人臣而用天子禮樂以祭宜人之心有所不服今也執事之臣各舉其職而無怠慢之意至於有廢職而不舉者則亦自服於大刑至此然後知天下大服而不以周公爲不可用天子禮樂也此皆魯人夸詞

是故夏禘秋嘗冬烝春社秋省而遂大蜡天子之祭也

約音藥省讀爲  
獮蜡鋤稼切

鄭氏曰不言春祠魯在東方王東巡守以春或闕之  
省讀爲獮獮秋田名也春田祭社秋田祭祊大蜡歲  
十二月索鬼神而祭之孔氏曰魯在東方朝常以春  
當朝之年以朝闕祭巡守在二月不於正月祭者諸  
侯預前待乎竟故也或曰不言春祠有脫文爾先儒  
謂王春東巡則魯闕春祭當朝之年用春則亦闕祭  
非也祭不可闕陳氏曰春言社則秋獮亦祀方詩曰  
以社以方是也秋言獮則春社亦蒐傳曰春蒐夏苗  
秋獮冬狩是也方氏曰酌嘗烝春社秋省凡此亦諸  
侯之所同然特魯行之禮有所隆爾馬氏曰天子大  
蜡八而魯以周公之功故得用之澄曰自孟春乘大  
路以下言魯之得郊祭郊者祭天於南郊以祈穀而  
以后稷配也自季夏六月以下言魯之得禘祭禘者  
祭文王於周公之廟而以周公配也君卷冕以下爲

夏酌秋嘗冬烝起文言魯之君夫人四時得服王之  
卷冕后之副褱而以天子之禮祭周公於大廟也蓋  
祐祠烝嘗祭名雖與諸侯同而用天子祭禮則與諸  
侯異與夫春蒐之祭社秋獮之祀方冬月之八蜡魯  
皆得以如  
天子也

# 大廟天子明堂庫門天子臯門雉門天子應門

鄭氏曰廟及門如天子之制天子五門臯庫雉應路  
魯有庫雉路則諸侯三門與孔氏曰周公大廟似天  
子明堂魯之庫門似天子臯門魯之雉門似天子應  
門制度高大如天子不必事事皆同也清江劉氏曰  
以詩書禮春秋考之天子三門諸侯三門門同而名  
不同天子有臯應畢無庫雉路諸侯有庫雉路無臯  
應畢明堂位所言蓋魯用王  
禮門制同王門而名不同也

振木鐸於朝天子之政也

鄭氏曰天子將發號令必以木鐸警衆陳氏曰古人出一號發一令皆聲以警之故振木鐸於朝鐸以金則服乎義而所用多在乎武事周官鼓人以金鐸通鼓司馬振鐸是已以木則取乎仁而所用多在乎文周官小宰小司徒皆云正歲率其屬而振之以徇于市此皆天子之政也方氏曰周官小宰帥治官之屬而觀治象之法徇以木鐸曰不用法者國有常刑以至鄉師士師宮正亦莫不用焉此非天子之政乎

山節藻梲復廟重檐刮楹達鄉反坫出尊崇坫康圭疏

屏天子之廟飾也

稅專悅切復音福重平聲檐以古切刮君八切達鄉去聲康音抗屏並經

切



鄭氏曰山節刻櫛盧爲山也藻稅畫侏儒柱爲藻文也復廟重屋也重檐重承壁材也刮刮摩也鄉爲夾戶窻也每室八窻爲四達反站反爵之站也出尊當尊南也唯兩君爲好既獻反爵於其上禮君尊于兩楹之間崇高也康讀爲亢龍之亢又爲高站亢所受圭奠于上焉屏謂之樹今穆思也刻爲雲氣蟲獸如今闕工孔氏曰此論魯大廟之飾櫛盧今之斗栱也侏儒梁上短柱也重檐者就外檐下壁復安板檐以辟風雨之灑壁楹柱也刮者以密石摩柱鄉謂窻牖達者牖戶通達站築土爲之兩君相見飲酒既獻反爵於站上故謂之反站尊在兩楹間站在尊南故云出尊崇站康主者亢舉也爲高站受賓之圭舉於其上上疏屏者疏刻也天子外屏人臣至屏俯伏思念其事穆思小樓也城隅闕上皆有之然則屏上亦爲屋以覆屏牆故云穆思也此皆天子廟飾反站亦在廟故合言廟飾也陸氏曰天子之桶斲之磬之加密

石馬刳楹其一隅也大廟旅楹徘徊皆有柱達鄉若  
今偷柱使前達也出尊使尊見焉康圭使圭安焉康  
讀如字方氏曰凡器仰之爲正覆之爲反反站所以  
覆爵也故爵站謂之反站凡物在內爲入在外爲出  
站在外故曰出崇站所以薦圭也故圭站謂之崇  
凡物措之則康站以措圭故曰康輔氏曰反站出尊  
言其所在崇站康圭言其所用互備也馬氏曰天子  
之廟飾不止於此此舉其略爾天子用其詳而魯用  
其略也

鸞車有虞氏之路也鉤車夏后氏之路也大路殷路也

乘路周路也

鉤古侯切  
乘去聲

鄭氏曰鸞有鸞和也鉤有曲輿者也大路木路也乘  
路玉路也漢祭天乘殷之路今謂之桑根車孔氏曰

此明魯有四代車其制各別路即車也鉤曲也輿則車牀曲輿謂曲前闌也虞質未有鉤矣輔氏曰虞夏言車殷周言輅各隨時代所稱意者殷周始稱車爲路爾自魯言之故下皆曰路也新安王氏曰舜時始有鸞和故其路謂之鸞車夏始有鉤車殷人重木路周天子乘玉路封同姓則有金路封異姓則有象路魯之乘路蓋金路也玉路非魯所敢僭故郊禮反用殷之大路鄭以乘路爲玉路非也

有虞氏之旂夏后氏之綏殷之大白周之大赤

綏注讀爲綏

鄭氏曰四者旂旗之屬也綏當爲綏讀如冠鞬之鞬有虞氏當言綏夏后氏當言旂此蓋錯誤也綏謂注旂牛尾於杠首所謂大麾書云武王左黃鉞右秉白旂以麾周禮王建大旂以賓建大赤以朝建大白以即戎建大麾以田也孔氏曰此論魯有四代旂旗虞氏之綏但注旂竿首未有旒緣夏后氏之旂漸文旒

注旄竿首又有旒綵大白謂白色旗大赤謂赤色旗  
大白大赤各隨代之色無所畫也應氏曰子華子曰  
舜建大常舜惟見旂常爾至夏則復綏之以羽旄綏  
者旒之係於繩而華者也陳氏曰旂之制始於舜此  
有虞氏之旂也至於夏則致飾矣故曰綏方氏曰旂  
卽所謂交龍爲旂也大帛卽雜帛之物也大赤卽通  
帛之纁也唯麾不在九  
旂之數故特以綏名之

夏后氏駱馬黑鬣殷人白馬黑首周人黃馬蕃鬣

駱音  
洛蕃

音煩鬣  
力輒切

孔氏曰此明魯有三代之馬夏尚黑故用黑鬣駱白  
黑相間也殷尚白頭黑而鬣白從所尚也二代俱以  
鬣爲所尚蕃赤也周尚赤用黃近赤也方氏曰馬以  
毛物爲主而鬣又毛之長者故三代之馬以鬣言之

陸氏曰魯雖兼用四代服器等物皆有所殺也駱馬黑鬣卽視乘驪白馬黑首卽視乘翰黃馬蕃鬣卽視乘駟然駱馬黑鬣夏后氏猶以爲黑白馬黑首殷人猶以爲白黃馬蕃鬣周人猶以爲赤輔氏曰殷周獨於此稱人者以言馬故也

夏后氏牲尚黑殷白牡周騂剛

騂息營切

孔氏曰魯用三代牲騂赤色剛牡也騂言剛則白亦剛白言牡則黑亦牡也方氏曰剛公羊氏作桐蓋牛也牡言其質剛言其性言二代如此則夏后氏尚黑亦用牡可知故湯用元牡擇者以爲未變夏禮也

泰有虞氏之尊也山罍夏后氏之尊也著殷尊也犧象

周尊也

著直略切

孔氏曰此明魯用四代尊有虞氏尚陶故泰用瓦壘  
猶雲雷也畫爲山雲之形也著無足而底著地殷尊  
無足其餘泰壘犧象並有足也方氏曰泰司尊彝謂  
大古之瓦尊山壘卽山尊也禮器亦謂之壘尊非謂  
諸臣所酢之壘也以山壘爲尊因謂之壘尊亦猶以  
壺爲尊因謂之壺尊也著附著之著下無所承著地  
而已殷質故其尊從簡如此飾以犧則曰犧尊  
飾以象則曰象尊周尚文故其尊有飾如此

爵夏后氏以琖殷以斚周以爵

斚音嫁  
又上聲

孔氏曰此明魯有三代爵並以爵爲形故并標名於  
其上琖以玉飾之殷亦爵形而畫爲禾稼斚稼也周  
爵或以玉爲之或飾之以玉方氏曰爵爲爵之形以  
承之自周始夏殷未承以爵而亦通謂之爵周以前  
止有爵之名周以後又有爵之形也陸氏曰琖以齊  
言斚以鬯言爵以酒言知然者盎齊亦或謂之琖酒

電尊一

名甬彝

灌尊夏后氏以雞夷殷以甬周以黃目

方氏曰灌尊所以實裸鬯之尊也孔氏曰此明魯有三代灌尊彝法也與餘尊爲法故稱彝彝者或刻木爲雞形而畫雞於彝甬畫爲禾稼黃目以黃金爲目鄭氏曰夷讀爲彝周禮春祠夏禴裸用雞彝鳥彝日嘗冬烝裸用甬彝黃彝

其勺夏后氏以龍勺殷以疏勺周以蒲勺

勺市灼切

方氏曰勺用以酌酒者孔氏曰龍勺勺爲龍頭疏謂刻鏤通刻勺頭蒲謂合蒲刻勺爲鳧頭其口微開如蒲草本合而未微開也陸氏曰龍勺爲龍頭蒲勺爲鳧頭疏勺爲雉頭

土鼓蕢桴葦籥伊耆氏之樂也拊搏玉磬拊擊大琴大

瑟中琴小瑟四代之樂器也

蕢音塊桴音浮葦云鬼切籥音藥拊音甫搏音博拊

瑟音

孔氏曰此明魯用古代樂及四代樂器土鼓謂築土爲鼓蕢桴以土塊爲桴葦籥謂截葦爲籥鄭氏曰蕢當爲由籥如笛三孔伊耆氏古天子有天下之號也今有姓伊耆氏者四代虞夏商周也方氏曰古者以土爲鼓未有輝葦之聲故也以由爲桴未有斲木之利故也以葦爲籥未有截竹之精故也拊搏拊擊與書言戛擊鳴球搏拊琴瑟同義玉磬琴瑟皆堂上之樂琴言中不言小瑟言小不言中互相備也陸氏曰拊取聲淺搏取聲深拊取聲淺擊取聲深



魯公之廟文世室也武公之廟武世室也

鄭氏曰此二廟象周文王武王之廟也世室者不毀之名也魯公伯禽也武公伯禽之玄孫也名敖孔氏曰魯公伯禽有文德世世不毀其廟象周之文世室武公有武德其廟不毀象周之武世室按成公六年五武宮公羊左氏並譏其不宜立此記笑成王褒崇魯國而已武公之廟立而不毀在成公之時作記之人因成王褒魯遂連文美之非實辭也輔氏曰觀此篇所載成王之賜伯禽未必如是之備亦有魯君因仍而僭用之者矣新安王氏曰此言尤不可信周公爲魯太祖而開國實係魯公然其廟不毀不可援文王爲比若武公乃伯禽玄孫毀廟復立季氏爲之也且季氏立已毀之廟者有二煬公之廟毀而復立煬公以弟繼兄者也武公之廟毀而復立武公舍長立少者也二者皆季氏不臣之心春秋書立武宮立煬

宮以罪季氏鄭不考其故乃曰世室不毀之廟夫昭穆遞遷則毀武公之廟禮也毀而復立非禮也而此之於武之世室甚乖春秋之旨

米廩有虞氏之庠也序夏后氏之序也瞽宗殷學也類

宮周學也

判類音

孔氏曰此明魯得立四代之學魯之米廩是有虞氏之庠魯有虞庠爲廩以藏棗盛鄭氏曰庠序亦學也瞽宗樂師瞽矇之所宗也古者有道德者使教焉死則以爲樂祖於此祭之方氏曰天子曰辟廱諸侯曰類官類官者半辟廱之制孟子言殷爲序周爲庠而此以夏后爲序虞爲庠者蓋以其養人於此則皆可謂之庠以其習射於此則皆可謂之序也

崇鼎貫鼎大璜封父龜天子之器也越棘大弓天子之

戎器也

璜音黃

鄭氏曰崇貫封父皆國名文王伐崇古者伐國遷其重器以分同姓大璜夏后氏之璜越國名也棘戟也方氏曰左氏曰周公相王室以君矢下於周為睦分魯公以大路大旂夏后氏之璜封父之繁弱繁弱則大弓也陸氏曰大璜封父龜傳所謂夏后氏之璜封父之繁弱是也蓋此龜一名繁弱宜以善中名之歟大弓武王之弓也周公受賜藏之魯以周賜我為夸故曰天子之器也其言天子之禮之祭之政之廟飾之戎器其以為夸一也

夏后氏之鼓足殷楹鼓周縣鼓

縣音玄

鄭氏曰足謂四足也楹謂之柱貫中上出也縣縣之莫虞也殷頌曰植我鼗鼓周頌曰應輦縣鼓方氏曰楹以

貫中縣則在上獨足為在下故特謂之鼓足陳氏曰足不若楹之高楹不若虞之垂亦其後世之加隆爾

垂之和鍾叔之離磬女媧之笙簧

媧古切

鄭氏曰垂堯之共工也叔未聞女媧三皇承宓犧者和離謂次序其聲縣也笙簧笙中之簧也孔氏曰垂所作調和之鍾叔所作編離之磬女媧所作笙中之簧三者先代之樂魯皆有之鄭注和離謂次序其聲縣聲解和也縣解離也陸氏曰和鍾編鍾也離磬特磬也陳氏曰古者造笙以匏為母列管匏中施簧管端大者十九簧小者十三簧笙簧始於女媧氏簧非特施於笙又施於竽笙簧十三或十九竽簧三十六夏后氏之龍箏虞殷之崇牙周之壁翬

箏音笋虞其矩切翬所甲切

孔氏曰此明魯有三代樂縣之飾筍飾以鱗此并云虞者蓋夏時箏與虞皆飾以鱗至周乃別故云龍箏虞殷

則於箕之上刻畫木為崇牙之形以挂鐘磬也。嬰扇也。言周畫繒為扇戴小壁於扇之上。鄭氏曰：「箕虞所以縣鐘磬也。」橫曰：「箕飾之以鱗屬植曰虞。」飾之以羸屬羽屬箕以大板為之。謂之業殷又於龍上刻畫之為崇牙。以挂縣紃也。周又畫繒為嬰戴以壁垂五采羽於其下。樹於箕之角上飾彌多也。周頌曰：「設業設虞崇牙。」樹羽方氏曰：「其崇如牙。」夏后氏有箕虞而未有崇牙。商有崇牙而未有壁。嬰至周然後三者兼備焉。此皆漸致其文也。

有虞氏之兩敦夏后氏之四璉殷之六瑚周之八簋敦

對又音堆璉力展切瑚音胡

鄭氏曰：「皆黍稷器制之異。同未聞方氏曰：「敦曰璉曰瑚曰簋所命名不同。或兩或四或六或八則漸增其數也。」陸氏曰：「兩敦黍稷四璉黍稷稻粱六瑚黍稷稻粱麥苽八簋黍稷稻粱白黍黃粱稭稬按簋

是盛黍稷之器  
其盛稻粱名簠

俎有虞氏以椀夏后氏以巖殷以楩周以房俎

俱甫切

鄭氏曰椀斷木為四足而已巖之言蹙也謂中足為橫距之象楩之言枳楩也謂曲撓之也房謂足下跗也上下兩間有似於堂房孔氏曰椀有四足虞氏未之餘飾巖足間有橫周謂此俎之橫者為距楩枳之樹其枝多曲撓殷俎似之周俎頭各有兩足足下各別為跗足間橫者似堂之壁橫下二跗似堂之東西頭各有房方氏曰椀者斷木為足無餘飾也巖者於足間加橫木焉植為立橫為巖也楩者既有橫木又為曲撓之形陳氏曰殷之橫距與夏同而曲其足與三代異周之下跗與三代異而直其足與虞夏同詩言大房傳言房烝此房俎也少牢禮言俎距此橫距也其高下脩廣無文舊圖謂高二尺四寸廣尺四寸不可考

夏后氏以楬豆殷玉豆周獻豆

楬苦瞎切獻素何切又如字

鄭氏曰楬無異物之飾獻疏刻之孔氏曰獻音娑娑是希疏之義方氏曰楬豆未有它飾以木爲柄若蜡氏之楬而已玉豆則於楬之上又飾之以玉也獻若周官所謂再獻之獻再獻對朝踐言之則朝踐爲初獻矣醢人所謂朝踐之豆者初獻也所謂饋食之豆者再獻也此言獻豆則主祭祀之豆爾以祭祀之豆爲疏刻則燕饗之豆不疏刻矣司尊彝所謂獻尊義亦類此皆漸增其飾也陳氏曰楬者木之屬也以木爲之則無飾楬以言其制玉以言其飾犧以言其用

有虞氏服韍夏后氏山殷火周龍章

韍音弗

鄭氏曰韍冕服之緝也舜始作之以尊祭服禹湯至周增以畫文後王彌飾也天子備焉諸侯火而下卿

大夫山士韎韋而已孔氏曰此論魯有二代黻制虞氏直以韋爲黻未有異飾夏后氏畫之以山殷增以火周人加龍以爲文章士韎韐無飾推此卽尊者飾多此有四等天子至士亦四等故知卿大夫加山諸侯加火天子加龍方氏曰有山有火而又加之以龍則其文成矣於周特言韋馬章者文之成也

# 有虞氏祭首夏后氏祭心殷祭肝周祭肺

陳氏曰祭以右手凡祭必於脯醢之豆間祭之尚肺周禮而已若有虞氏則祭首夏后氏則祭心殷則祭肝以時異則禮異也周之尚肺特宗廟賓客飲食之間而已若五祀則戶先脾中雷先心門先肝以事異則禮異也特牲饋食先祭肺後祭肝祀亦祭肺後祭肝則祭肺非不祭肝也以肺爲主爾由是推之夏殷非不祭肺以心與肝爲主而已方氏曰有虞氏祭首尚用氣也氣有陰陽之異以陽爲主爾首者氣之陽



也至於三代則各祭其所勝夏尚黑勝赤故祭心心於色爲赤也殷尚白勝青故祭肝肝於色爲青也周尚赤勝白故祭肺肺於色爲白也

### 夏后氏尚明水殷尚醴周尚酒

鄭氏曰此皆其時之用非尚也孔氏曰夏后氏尚質故用水殷入稍文故用醴周人轉文故用酒按儀禮設筭工玄酒是周尚明水也禮運云澄酒在下則周不尚酒言尚非也方氏曰明水者陰鑑取於月得之於天者也醴則漸致其味成之以人者也然僅足以爲禮而已酒則味成而可薦焉厚之至也

### 有虞氏官五十夏后氏官百殷二百周三百

鄭氏曰周之六卿其屬各六十則周三百六十官也此云三百者記時冬官亡魯義曰天子立六官三公

九卿二十七大夫八十一元士凡百二十蓋謂夏時也。以夏周推前後之差有虞氏官宜六十夏后氏宜百二十殷宜二百四十不得如此。記孔氏曰：此明魯兼有四代之官。魯是諸侯，按大宰職：諸侯唯有三卿五大夫，故公羊傳：司徒司空之下各有二小卿。司馬之下有一小卿，是三卿五大夫。今魯雖被褒崇，何得備四代之官？與三百六十職蓋成王褒崇於魯，使魯雜存四代官職，名號非謂魯盡備其數也。記者盛美於魯，因舉四代之官，本數言之。方氏曰：周官三百六十，此止言三百，亦以其大數而已。先儒遂以冬官之亡為言，豈其然乎？輔氏曰：魯百里之國，決不能盡備四代之官。此皆夸辭也。以此例上所言可知也。陸氏曰：車旂言四代，馬言三代，尊言四代，其爵其彝其弓言三代，簋俎言四代，豆言三代，祭言四代，其牲其酒言三代，敔言四代，學言四代，官言四代，重者舉四亦言之。法若樂言伊耆氏之土，鼓女媧之笙簧，與四代之

樂矣其鼓其篥  
虞舉三代可也

有虞氏之綏夏后氏之綢練殷之崇牙周之璧翬

綏綢綢綢

王刀切

鄭氏曰綏亦旌旗之綏夏綢其杠以練爲之旒殷又  
刻繪爲崇牙以飾其側亦飾彌多也此旌旗及翬皆  
喪葬之飾周禮大喪葬中車執蓋從車持旌御僕持  
翬旌從遣車翬夾柩路左右前後天子八翬皆戴璧  
垂羽諸侯六翬皆戴圭大夫四翬士二翬皆戴綏孔  
氏曰此明魯有四代喪葬旌旗之飾夏旒綢杠以練  
又以練爲旒殷刻繪爲崇牙之形以飾旌旗之側周  
尚文更取它物飾之不用牙也周以物爲翬翬上戴  
璧陳之以鄭柩車前文崇牙璧翬是飾篥虞此是喪  
葬之飾方氏曰公西赤云孔子之喪曰飾棺牆置翬

設披周也設崇殷也綢練設旒夏也正謂是矣陳氏曰喪禮旌旗之飾亦有崇牙棺牆之飾亦有壁筓與箕虞同者爲欲使勿之有惡爾

凡四代之服器官魯兼用之是故魯王禮也天下傳之久矣君臣未嘗相弑也禮樂刑法政俗未嘗相變也天下以爲有道之國是故天下資禮樂焉

孔氏曰記者既陳四代服器官於前此結之於後美大魯國伊耆氏之樂女媧之笙簧非唯四代據其多者言之爾亦有但舉三代者然四代服器魯家每物之中得用之不謂事事盡用也作記時是周末唯魯獨存周禮故以爲有道之國左傳云諸侯來魯於是觀禮是天下資禮樂也鄭氏曰王禮天子之禮也傳

傳世也資取也此蓋盛周公之德爾春秋時魯三君  
弑又士之有誅由莊公始婦人壻而弔始於狐貍云  
君臣未嘗相弑政俗未嘗相變亦近誣矣王氏曰周  
公有人臣所不能爲之功德而報之以人臣所不得  
用之禮樂程子曰周公之功固大矣皆臣子之分所  
當爲魯安得獨用天子禮樂哉澄按周末無識之儒  
不知魯用天子禮樂之爲非方且極推其盛以爲夸  
以其意在於夸也故其言多有非實者而石林葉氏  
又欲爲之掩護以爲成王伯禽無失  
禮作明堂位者無失辭其誤亦甚矣

### 右記魯用天子禮樂

禮記纂言卷九

欽定四庫全書

經部  
禮記纂言卷十

詳校官通政使<sub>臣</sub>夢吉

給事中<sub>臣</sub>溫常綬覆勘

總校官編修<sub>臣</sub>王燕緒

校對官中書<sub>臣</sub>潘奕雋

謄錄監生<sub>臣</sub>汪元亮

欽定四庫全書

禮記纂言卷十

元 吳澄 撰

喪大記

鄭氏曰喪大記者記人君以下始死小斂大斂殯葬之事方氏曰喪無非大事也然禮有大小此篇所記以大者為主故名喪大記澄曰此篇是每章各記一事之大節非是逐句補記行事之小節故云大記

疾病外內皆埽君大夫徹縣士去琴瑟寢東首於北牖下廢牀徹褻衣加新衣體一人男女改服屬纊以俟絕



氣男子不死於婦人之手婦人不死於男子之手

婦悉報切

縣音玄去起呂切首手又切  
藪息列切屬音燭續音曠

鄭氏曰疾困曰病外內皆歸爲賓客將來問病也微  
縣去琴瑟聲音動人病者欲靜也凡樂器天子宮縣  
諸侯軒縣大夫判縣士特縣去琴瑟者不命之士寢  
東首於北牖下謂君來視之時也牖下或爲墉下廢  
牀廢去也人始生在地去牀庶其生氣反徹褻衣則  
所加者新朝服矣互言之也加朝服者明其終於正  
也體一人體手足也四人持之爲其不能自屈伸也  
男女改服爲賓客將來問病亦朝服也庶人深衣續  
新綿易動搖置口鼻之上以爲候男子不死於婦人  
之手婦人不死於男子之手君子重終爲其相褻應  
氏曰掃庭及堂正家之常道於此又皆婦者肅外內  
以謹變致潔敬以謹終也樂琴瑟自其疾卽不作則

聲音固已久聞於耳矣微而去之亦不欲接於目也  
李氏曰東首所以歸魂於陽北牖下所以反魄於陰  
使之各歸其真宅方氏曰北牖與郊特牲北牖同欲  
君南面而視之故也孔氏曰此篇所記皆據諸侯以  
下君謂諸侯東首東方生長向生氣也養疾者齊玄  
至病因改服易羔裘玄冠服朝服也馬氏曰君子於  
其生也欲內外之有別於其死也欲始終之不褻則  
男女之分明夫婦之化興昔者曾子寢疾病樂正子  
春坐於牀下曾元曾申坐於足童子隅坐而執燭論  
語亦云召門弟子曰啓予足啓予手則曾子之死唯  
弟子與子侍側而已

君夫人卒於路寢大夫世婦卒於適寢內子未命則死

於下室遷尸于寢士之妻皆死于寢

適當  
歷切

鄭氏曰死者必當正寢君謂之路寢大夫謂之適寢士或謂之適室寢室通爾變命婦言世婦者明尊卑同也世婦以君下寢之上爲適寢內子卿之妻也下室其燕處也孔氏曰諸侯有三寢一正者曰路寢二曰小寢夫人亦有三寢一正二小適寢猶今聽事處其制異諸侯大夫與妻皆死於適寢世婦是諸侯之次婦大夫妻曰命婦而云世婦命婦尊與世婦敵故互言命婦死於正寢則世婦死女君次寢之上也卿之妻未爲夫人所命則死在下室至小斂後遷尸還正寢也士之妻各死正室夫妻皆然故云皆也士喪禮云死于適室此云卒於適寢是寢室通也澄曰此記止是記君大夫士與其正妻死處不及其次妻世婦謂大夫之正妻非言諸侯次婦以其名稱與諸侯次婦同故注疏因而言其死處也天子適后之次稱夫人故諸侯以天子之次婦爲適妻之稱諸侯適夫人之次稱世婦故大夫以諸侯之次婦爲適妻之稱

遞降一等也。內子即大夫之正妻。未受夫人所命則未可稱世婦。改但稱內子。內子蓋已命。未命之通稱。世婦亦內子也。

○復有林麓則虞人設階。無林麓則狄人設階。

鄭氏曰：復招魂復魄也。階所乘以升屋者。虞人主林麓之官也。狄人樂吏之賤者。階梯也。箕虞之類。孔氏曰：死者封內若有林麓則虞人設階梯而升屋。官職卑小不合有林麓。故狄人設箕虞之類爲階梯也。方氏曰：設階必以虞人者。以階之材必取諸林麓而虞人則掌林麓之官也。無林麓則無虞人。故以樂吏之賤者代之。

小臣復復者朝服。君以卷。夫人以屈狄。大夫以玄纁。世

婦以禮衣士以爵弁士妻以稅衣皆升自東榮中屋履

危北面三號捲衣投于前司服受之降自西北榮

卷與衾同

屈音闕頤勅負切禮知彥切稅  
宅亂切號戶高切捲幾勉切

鄭氏曰小臣君之近臣也朝服而復所以事君之衣  
也用朝服而復之者敬也復用死者之祭服以其求  
於神也君以卷謂上公也夫人以屈狄互言耳上公  
以衾則夫人用褕衣而侯伯以鷩其夫人用褕狄子  
男以毳其夫人乃用屈狄矣頤赤也玄衣赤裳所謂  
卿大夫自玄冕而下之服也其世婦亦以禮衣榮屋  
翼升東榮者謂卿大夫士也天子諸侯言東雷危棟  
上也號若云臯某復也司服以篋待衣於堂前孔氏  
曰小臣君之親近臣冀君魂來依之大夫士以下亦  
用近臣也君以卷謂上公以衾冕而下夫人以屈狄

謂子男之夫人男子舉上公婦人舉子男之妻男子  
舉上以見下婦人舉下以見上是互言也大夫招魂  
用玄冕玄衣纁裳故云玄纁也世婦大夫妻其上服  
唯禮衣言世婦亦見君之世婦服與大夫妻同也士  
以爵弁士助祭上服也六冕則以衣名冠諸侯爵弁  
則以冠名衣今言爵弁但用其衣不用其弁也士妻  
以稅衣六衣之下也皆升自東榮者復者升東翼而  
上也天子諸侯四注爲屋東西兩頭爲屋簷雷下故  
言雷大夫以下但南北二注而爲直頭頭即屋翼自  
此升也中屋履危者當屋東西之中履屋上高危之  
處而復也北面求陰之義鬼神所嚮也三號者一號  
於上冀神在天而來一號於下冀神在地而來一號  
於中冀神在天地之間而來也三招既竟捲斂所復  
之衣從屋前投與司服之官司服待衣於堂前者前  
謂陽生之道復是求生也如雜記所言則每衣三號  
降自西北榮者復者投衣畢往西北榮而下也初復

是求生故升東榮而上求既不得不忍虛從所求不  
得之道還故就幽陰而下也馬氏曰始死者人以不  
忍之心而望其重生求生者人以必還之理而欲其  
不死故謂之復自君至于士自夫人至于士妻各以  
其祭服之盛者招之庶乎神之依是而來也中屋履  
危則求之上下之間北面三號則求諸幽陰之義及  
乎不知神所在而卒不復也然後捲衣投于前而降  
焉蓋死矣滅矣不可以復生矣然而死者不可以復  
生萬物自然之理也於死而必爲復既死而卒不能  
復聖人制此豈虛禮歟亦以謂孝子之情苟可以死  
生而肉骨者無不爲已

其爲賓則公館復私館不復其在野則升其乘車之左

轂而復

乘繩證切  
轂工木切

鄭氏曰私館卿大夫之家  
也不於之復爲主人之惡

復衣不以衣尸不以斂婦人復不以衾

力衣尸於既切斂  
驗切衾而廉

切

鄭氏曰不以衣尸謂不以襲也復者庶其生也若以  
其衣襲斂是用生施死於義相反士喪禮云以衣衣  
尸浴而去之衾嫁時上服非事鬼神之衣也孔氏曰  
絰襚衣下曰衾長樂陳氏曰不以衣尸不以斂於文  
爲駢本但云復衣以衣尸不以斂也以衣尸者卽士  
喪禮以衣衣尸者也  
不以斂者卽士喪禮浴而去之  
者也方氏曰稅與衾皆謂之緣衣或以復或不以復  
者蓋祭之緣衣則謂之稅嫁之緣衣則謂之衾此其  
所以異復各以死者之祭服以其求於神故也山陰  
陸氏曰復世婦以檀衣士妻以稅衣檀衣有衾稅衣



亦有袖復升而袖下垂故不以

### 凡復男子稱名婦人稱字

鄭氏曰婦人不以名行孔氏曰殷以上貴賤復同呼名周則天子稱天子諸侯稱某甫且字矣大夫士稱名婦人並稱字

### 唯哭先復復而後行死事

鄭氏曰氣絕則哭哭而復復而不蘇可以為死事孔氏曰氣絕孝子即哭哭訖乃復故云唯哭先復復而不生故行死事謂正尸於牀及浴襲之屬也

### 右記初復凡二節

始卒主人啼兄弟哭婦人哭踊

鄭氏曰悲哀有深淺也若嬰兒中路失母能勿啼乎  
孔氏曰主人孝子男子女子也哀痛嗚咽不能哭故  
啼也有聲曰哭兄弟情比主人爲輕故哭有聲也婦  
人衆婦也宗婦亦啼衆婦人輕則哭也婦人雀踊而  
此云踊者通自上諸條並踊也山陰陸氏曰主人啼  
而不哭兄弟哭而不踊婦人哭踊殺於上矣蓋踊所  
以動體妄  
心下氣也

既正尸子坐于東方卿大夫父兄子姓立於東方有司  
庶士哭於堂下北面夫人坐于西方內命婦姑姊妹子  
姓立于西方外命婦率外宗哭于堂上北面

鄭氏曰正尸者謂遷尸牖下南首也子姓謂衆子孫也其男子立於主入後女子立於夫人後世婦爲內命婦卿大夫之妻爲外命婦外宗姑姊妹之女孔氏曰此明人君初喪哭位按既夕禮設牀第當牖士喪禮將舍商祝入當牖北面故知正尸牖下南首也子謂世子世子尊故坐於東方士喪禮主人坐于牀東是也卿大夫父兄子姓立于東方以士喪禮言衆主人在其後又云親者在室謂大功以上當在室內東方但諸侯以上位尊故顧命康王之入翼室恤宅宗不宜與卿大夫父兄子姓俱在室內也卿大夫等或當在戶外之東方遙繼主人之後也有司庶士卑故在堂下北面按士喪禮云小功以下衆兄弟堂下北面此直云有司庶士在堂下則諸父兄子姓等雖小功以下皆在堂上西面也夫人坐于西方者亦近尸故士喪禮云婦人俠牀東面但士禮略人君當以帷障之內命婦則子婦也姑姊妹謂君姑姊妹也子姓

君女孫皆立于西方也外命婦外宗疏於內命婦故在戶外婦人無堂下之位故皆堂上北面舅之女及從母之女外宗中兼之也山陰陸氏曰卿大夫序于父兄子姓之上國事先君臣也諸侯爲卿大夫服而不服父兄子姓以此序內命婦在上豈諸侯爲內命婦服視卿大夫服歟應氏曰男東女西陰陽之大分也喪遽哀迫人雜事叢先謹男女之辨而各以類從則紛糾雜亂者有倫矣主東賓西內外之大統也男主居東之上而內之家長雖若母亦在其西則示一國一家之有主而內外族姓之尊卑咸有所統攝矣

大夫之喪主人坐于東方主婦坐于西方其有命夫命

婦則坐無則皆立

鄭氏曰命夫命婦來哭者同宗父兄子姓姑姊妹子姓也凡此哭者尊者坐卑者立孔氏曰此明大夫初

喪哭位哭位之中有命夫命婦雖卑於死者以其位尊故坐哭若其無命夫命婦雖尊於死者亦立哭此是爲喪來哭者若有弔者當立哭不得坐也不顯父兄子姓及姑姊妹哭位者約上文居喪及下文士喪略可知也皇氏云凡哭君與大夫爵位尊者坐卑者立故君喪子及夫人坐卿大夫皆立也大夫之喪主人主婦命夫命婦坐非命夫命婦者皆立也此等卑非對死者爲尊卑若今所行之禮與古異成服之後尊於死者則坐卑於死者則立也

士之喪主人父兄子姓皆坐于東方主婦姑姊妹子姓皆坐于西方

鄭氏曰士賤同宗尊卑皆坐孔氏曰君與大夫位尊故坐者殊其貴賤士既位下故坐者等其尊卑無所

異也

凡哭尸于室者主人二手承衾而哭

鄭氏曰承衾哭者哀慕若欲攀援

○君之喪未小斂爲寄公國賓出大夫之喪未小斂爲

君命出士之喪於大夫不當斂則出

爲寄云偏切下爲母爲其皆同

鄭氏曰父母始死悲哀非所尊不出也出者或至庭或至門國賓聘大夫不當斂其來非斂時孔氏曰此明君大夫士未小斂之前主人出迎賓之節寄公失位之君也國賓鄰國大夫來聘者世子迎寄公及國賓士出迎大夫皆至庭大夫於君命至門世子於天子之命士於君命亦然士之喪大夫來弔不當小斂

之時主人無事則出迎大夫若來弔當小斂之時則  
擯者以主人有事告不出迎也但云斂不云襲者未  
襲之前唯爲君命出其餘則不出故士喪禮未襲之  
前君使人弔主人迎于寢門外君使退主人哭拜送  
於外門外於時實有大夫則拜之非特出迎賓也雜  
記云士喪當袒大夫至絕踊而拜之亦謂斂後正斂  
時不出也

凡主人之出也徒跣扱衽拊心降自西階君拜寄公國  
賓于位大夫於君命迎于寢門外使者升堂致命主人  
拜于下士於大夫親弔則與之哭不逆於門外

跣悉與  
扱扱初

浴切衽而審  
切拊音撫

鄭氏曰拜寄公國賓於位者於庭鄉其位而拜之此時寄公位在門西國賓位在門東皆北面小斂之後寄公東面國賓門西北面士於大夫親弔謂大夫身來弔士也與之哭既拜之卽位西階東面哭大夫特來則北面孔氏曰前經明出迎賓遠近此更辨拜迎委曲之儀降自西階不忍當主位也寄公在門西者寄公有賓義也國賓在門東者本是吉使行私弔之禮故從主人之位皆北面者凡賓弔北面是其正尸在堂工故鄉之也寄公小斂後稍依吉禮就賓位東面鄉主人也國賓亦以小斂後漸吉就賓位但爵是卿大夫猶北面也士之喪大夫身親來弔士不出迎大夫於門外其大夫若與士俱來則立于西階下之南東面主人降西階下南面拜之拜訖卽西階下位在大夫之北與大夫俱東面哭若大夫獨來不與士相隨則大夫北面必北面者凡特弔皆北面也



夫人爲寄公夫人出命婦爲夫人之命出土妻不當斂則爲命婦出

鄭氏曰出拜之於堂上也此時寄公夫人命婦位在堂上北面小斂之後尸西東面孔氏曰前明男子迎賓此明婦人迎賓也出謂出房婦人不下堂但出房而拜於堂上也婦人尊卑與夫同故所爲出者亦同也君之喪外命婦率外宗哭於堂上北面故此時在堂上北面也小斂之後遷尸於堂故從婦人之位在尸西東面也

右記哭位迎賓凡二節

始死遷尸于牀幘用斂衾去死衣小臣楔齒用角柶綴

足用燕几君大夫士一也

撫荒胡切去死起呂切楔桑結切綴頁劣切又貞衛切

鄭氏曰牀謂所設牀第當牖者也士喪禮曰士死於適室幰用斂衾去死衣病時所加新衣及復衣也去之以俟沐浴孔氏曰尸初在地冀生氣復既不生故遷于牀離初死處近南當牖前所謂正尸也幰覆也斂衾者大斂之衾被也遷尸在牀用斂衾覆之楔齒柱也衲以角爲之長六寸兩頭屈曲將含恐口閉急故使小臣以衲柱張尸齒令開也尸應著屨恐足辟戾亦使小臣側几於足令几脚南出綴拘尸足兩邊令直不辟戾也既夕禮綴足用燕几杖在南御者坐持是也自始死至此貴賤同

○管人汲不說編屈之盡階不升堂授御者御者入浴小臣四人抗衾御者二人浴浴水用盆沃水用料浴用

絺中拒用浴衣如它日小臣爪足浴餘水棄于坎其母

之喪則內御者抗衾而浴

說吐活切緇均必切抗苦浪切科音斗又音主拒音震

鄭氏曰抗衾者蔽上重形也拒拭也爪足斷足爪也孔氏曰管人主館舍者汲謂汲水緇汲水瓶索也遽

促於事故不說去井索但縈屈執之於手中以水從西階而升盡不上堂用盆盛浴水用料酌盆水沃尸用盤於牀下盛浴水絺是細葛除垢爲易用生時浴衣拭尸肉令燥如它日謂如平生尋常之日也浴竟小臣剪尸足之爪坎者匍人所掘階間取土爲竈之坎內御婦人也內外宜別故母喪用內御舉衾事事如前唯浴用人不同爾方氏曰管人主管籥之人也井竈亦其所司故使之汲水焉科以木爲之

○管人汲授御者御者差沐於堂上君沐梁大夫沐稷

士沐梁甸人爲筮于西牆下陶人出重鬲管人受沐乃  
煮之甸人取所徹廟之西北扉薪用爨之管人授御者  
沐乃沐沐用瓦盤拒用巾如它日小臣爪手剪須濡濯  
棄于坎差七何切筮音役重平聲鬲音歷煮諸許切扉  
扶味切爨七迨切濡奴亂切濯直孝切坎口感  
切

鄭氏曰差浙也浙飯米取其潘以爲沐也浴沃用料  
沐於盤中文相變也士喪禮沐稻此云士沐梁蓋天  
子之士也以差率而上之天子沐黍與孔氏曰梁稷  
皆謂用其米取汁而沐也甸人主郊野之官筮土壘  
竈將沐甸人爲土壘壘竈于西牆下以煮沐汁陶人  
作瓦器之官重鬲謂縣重之鬲是瓦瓶受三升以沐

米爲粥實於瓶以疏布罩口繫以篋縣之覆以蓆簾也浙於堂上管人亦升盞等不上堂就御者受浙汁往西牆於筵竈局中煮之旬人取復魄人所徹正寢西北扉以然竈煮沐汁灑然也煮汁孰管人取以升階授堂上御者御者乃爲尸沐瓦盤貯沐汁用巾拭髮及面拒晞也清也事事如平生小臣剪手爪治須象平生也濡謂煩攪其髮濯謂不淨之汁所濡濯汁棄坎中巾櫛浴衣亦并棄之其坎坎南順廣尺輪二尺深三尺南其壞此沐汁棄於坎則浴汁亦然沐與浴俱有料有盤浴云用料沐云用盤故云文相變

○君設大盤造冰焉大夫設夷盤造冰焉士併瓦盤無冰設牀禮第有枕含一牀襲一牀遷尸于堂又一牀皆

有枕席君大夫士一也

造七報切併步頂切禮之善切第側里切含胡暗切

鄭氏曰造猶內也禮第袒簣也謂無席如浴時牀也  
禮自仲春之後尸既襲既小斂先內冰盤中乃設牀  
於其上不施席而遷尸焉秋涼而止士不用冰以瓦  
爲盤併以盛水耳漢禮大盤廣八尺長丈二深三尺  
赤中夷盤小焉周禮天子夷盤士喪禮君賜冰亦用  
夷盤然則其制宜同之孔氏曰造冰者造內其冰於  
盤中夷盤亦內冰小於大盤置冰於下設牀於上去  
席禮露茅簣浴時無席爲漏水也設冰無席爲通寒  
氣也含襲遷尸此三節各有牀皆有枕席唯含一時  
暫徹枕使面平含竟並有枕含襲及堂皆有席也注  
云既襲謂大夫既小斂謂士皆其死  
之明日若天子諸侯三日而設冰也

○君錦冒黼殺綴旁七大夫玄冒黼殺綴旁五士緇冒  
黼殺綴旁三凡冒質長與手齊殺三尺自小斂以往用

夷衾夷衾質殺之裁猶冒也

冒莫報切黼音甫殺色戒切裁才再切

鄭氏曰冒者既襲所以韜尸重形也殺冒之下韜韜足上行者也小斂又覆以夷衾裁猶制也孔氏曰冒謂襲後小斂前所用以韜尸也冒制如直囊作兩囊各縫合一頭又縫連一邊餘一邊不縫兩囊皆然上者曰質下者曰殺其用之先以殺韜足而上後以質韜首而下君質用錦殺用黼綴旁七者不縫之邊上下安七帶綴以結之也大夫綴旁五士綴旁三者尊卑之差也上玄下纁象天地也以此推之士纁殺則君大夫畫殺爲斧文也凡冒謂通貴賤也冒之質從頭韜來至下長短與手相齊殺從足韜工長三尺自小斂以往往往猶後也小斂前有冒小斂後衣多故用夷衾覆之夷衾質殺之裁猶冒也者言夷衾上齊於手下三尺所用繪色及長短制度如冒之質殺但不復爲囊及旁綴也

右記浴沐含襲凡五節

小斂於戶內大斂於阼君以簞席大夫以蒲席士以葦

席

簞徒點切  
葦云鬼切

鄭氏曰簞細葦席也三者下皆有莞孔氏曰此明君大夫士小斂大斂所用之席士卑不嫌故得與君同用簞也按士喪禮記設牀當牖下莞上簞經云布席戶內下莞上簞謂小斂也大斂云布席如初始死至大斂用席皆有莞也大夫辟君上席以蒲若吉禮則蒲在莞下故司几筵蒲筵績純加莞席紛純與此異

○小斂布絞縮者一橫者三君錦衾大夫縞衾士緇衾皆一衣十有九稱君陳衣于序東大夫士陳衣于房中



皆西領北上絞紵不在列

絞戶交切稱尺證切紵其鵠切

鄭氏曰絞既斂所用束堅之者縮從也衣十有九稱法天地之終數也士喪禮小斂陳衣於房中南領西上與大夫異今此同蓋亦天子之士也絞衾不在列以其不成稱不連數也小斂無紵因絞不在列見之也或曰縮者二孔氏曰以布爲絞從者一幅豎置於尸下橫者三幅亦在尸下從者在橫者之上每幅之末析爲三片以結束爲便也君大夫士各用一衾故云皆一舒衾於此絞上君大夫士同用十九稱衣布於衾上然後舉尸於衣上屈衣裏又屈衾裏之然後以絞束之天數終於九地數終於十人既終故以天地終數斂之也陳衣謂將小斂陳衣也房中者東房大夫士唯有東房也絞紵不在十九稱之列

大斂布絞縮者三橫者五布紵二衾君大夫士一也君

陳衣于庭百稱北領西上大夫陳衣于序東五十稱西  
領南上士陳衣于序東三十稱西領南上絞紵如朝服

紵一幅爲三不辟紵五幅無純

不辟補麥切又音璧純當覽切

鄭氏曰二衾者或覆之或薦之如朝服者謂布精麤  
朝服十五升小斂之紵廣終幅析其末以爲堅之強  
也大斂之紵一幅三析用之以爲堅之急也純以組  
類爲之綴之領側若今被識矣生時禪被有識死者  
去之異於生也士喪禮大斂亦陳衣於房中南領西  
上與大夫異今此同蓋亦天子之士孔氏曰布絞縮  
者三謂取布一幅裂作三片直用之兩頭裂中央不  
通橫者五謂又取布二幅分裂作六片用五片橫於  
縮下布紵者禪被也皇氏云紵置絞束之下擬用舉  
尸今按記文紵在絞後當在絞上以絞束之二衾者

小斂君大夫士各一衾至大斂各加一衾其衾所用與小斂同但此衾一是始死覆尸者一是大斂時復制士既然明大夫以上亦然君陳衣百稱者衣多故陳在庭爲榮顯按雜記篇注襲禮大夫五諸侯七上公九天子十二稱則此大斂天子當百二十稱上公九十稱侯伯子男七十稱今云君百稱者舉上公全數言之北領謂尸在堂也西上由西階取之便也大夫士小斂衣少統於尸故北上大斂衣多故南上亦取之便也絞之與紼二者布精麤皆如朝服十五升絞以一幅之布分爲三不辟辟摩也辟讀爲摩假借字也小斂之絞全幅析裂其末爲三大斂之絞既小不復摩裂其末也小斂絞用全幅者以衣少欲得堅束力強也大斂一幅分爲三片者凡物細則束縛牢急以衣多故須急也統綴衿之領側若被識者領謂被頭側謂被旁識謂記識言綴此組類於領及側如今被之記識也澄曰絞一幅爲三不辟者辟讀如闕

開也蓋小斂之絞縮一橫三者曰一曰三皆以布之全幅爲數也大斂之絞縮三橫五者曰三曰五皆以布之小片爲數也橫絞之五既是以兩幅之布通身裁開爲六小片而用其五片矣縮絞之三亦是以一幅之布裁開其兩端爲三但中間當腰處約計三分其長之一不剪破爾其橫縮之絞八片皆狹小故結束處不用更辟裂之也若小斂橫縮之絞是全幅之布則其末須是剪開爲三方可結束也但其剪開處不甚長非如大斂之縮絞三分其長之二皆剪開也衿五幅者蓋用布五幅聯合爲一如今單布被斂衾直鋪布衿橫鋪斂時先繫捲布衿以包裏斂衾然後結束縮絞之三縮絞結束畢然後結束橫絞之五也

小斂之衣祭服不倒君無祿大夫士畢主人之祭服親

戚之衣受之以卽陳

遂襚音

鄭氏曰不倒尊祭服也斂者要方散衣有倒君無襚者不陳不以斂孔氏曰小斂十九稱不悉著之但用裹尸要取其方而衣有倒領在足間者唯祭服尊領不倒在足也君無襚者君斂悉用己衣不陳用它衣襚送者大夫士降於君小斂則先畢盡用己正服乃用賓客襚者也祭服言衣之美者若親屬有衣相送大功以上襚不將命自卽陳於房中小功以下及同姓皆將命受之而不以卽陳列也如皇氏意臣有致襚於君之禮但君不陳不以斂熊氏曰小斂之時君無以衣襚大夫士雖有不以斂至大斂則得用君襚其義俱通故兩存焉廬陵胡氏曰此謂小斂君不以衣襚大夫士若大斂則君襚澄曰鄭皇孔氏義同熊氏以大夫士爲句雖奇而鑿且此章每節皆言君與大夫士三者之禮如熊說則此節不言君禮而但言大夫士禮與前後節立文之例不合孔氏兩存其義猶或有疑胡氏專主其說則偏矣君無襚者謂君之

小斂但有己衣無祔衣雖有祔衣不用也大夫士則先盡用自己之正服乃繼用它人之祔服親屬謂小功以下若大功以上之祔不將命自卽陳於房中者用之以繼主人之正服而斂以下親戚之祔則須將命喪主但受之雖用以斂而未必盡用故不以卽陳也

小斂君大夫士皆用複衣複衾大斂君大夫士祭服無

筭君褶衣褶衾大夫士猶小斂也

複音福  
褶音牒

鄭氏曰褶裕也君衣尚多去其著也孔氏曰筭數也所有祭服大斂皆用之無限數也大夫士猶小斂則複衣複衾也據主人之衣故用複若祔亦得用裕故士喪禮云祔以褶也

袍必有表不禪衣必有裳謂之一稱

袍步毛切  
禪音單

鄭氏曰袍襲衣必有以表之乃成稱也孔氏曰袍有衣以表之不使禪露也死則冬夏並用袍上並加表熊氏云士襲用襲衣小斂有袍大斂亦有袍若大夫襲亦有袍雜記子羔之襲繭衣裳是也公則襲及大小斂皆不用襲衣雜記公襲無袍繭襲輕尚無大小斂無可知陸氏德明曰衣單複具曰稱

凡陳衣者實之篋取衣者亦以篋升降者自西階

篋古協切

鄭氏曰取猶受也澄曰篋盛之者示慎重不輕襲之意自西階者主人雖死視之如生不敢由主人之階也

凡陳衣不詘非列采不入絺綌紵不入

詘卽勿切紵直呂切

鄭氏曰不屈謂舒而不卷也列采謂正服之色絺綌紵當暑之襲衣也襲尸重形冬夏用袍及斂則用正

服孔氏曰此謂大夫以下若公則襲亦不用袍列采謂五方正色非雜色紕是細葛紕是麤葛紕是紕布不入不入陳之也

小斂大斂祭服不倒皆左衽結紕不紕

紕女九切

孔氏曰此明斂衣之法前已言小斂不倒大斂亦不倒此又言小斂者爲下諸事出也皆者大斂小斂同也衽衣襟也生鄉右左手解袖帶便也死則襟向左示不復解也結紕不紕者生時帶並爲屈紕使易抽解若死則無復解故紕束畢結之不爲紕也鄭氏曰衽向左反生時也

○君之喪大胥是斂衆胥佐之大夫之喪大胥侍之衆

胥是斂士之喪胥爲侍士是斂

胥舊讀爲祝今如字



鄭氏曰胥樂官也不掌喪事胥當爲祝字之誤也侍  
猶臨也大祝之職大喪贊斂喪祝卿大夫之喪掌斂  
士喪禮商祝主斂孔氏曰大祝是接神者故君喪使  
斂衆祝喪祝也賤故副佐大祝也大夫卑故大祝侍  
之侍謂臨檢之也君應有待者不知何人也喪祝卑  
故親斂士之喪喪祝臨之士之朋友來助斂也士喪  
禮士舉遷尸是也商祝祝習商禮者澄曰大胥非謂  
樂官之大胥按周官大祝之下有胥四人所謂大胥  
者大祝之胥也喪祝之下有胥四人所謂衆胥者衆  
祝之胥也大祝之爵爲下大夫喪祝之爵爲上士非  
能親執斂役者故雖身親蒞事而各以其下之胥服  
勞侯國之祝雖非四命之下大夫三命之士等而衰  
之其命數大祝當降國卿一等衆祝當降二等胥各  
四人當亦如王朝之數國君之斂大胥四人親斂衆  
胥二人佐之以足六人之數祝官臨檢記雖不言孔  
疏謂君應有待者不知何人蓋大祝也大夫之斂則

大胥二人臨檢衆胥四人親檢士之斂  
則衆胥二人臨檢士之友四人自斂

### 斂者旣斂必哭

孔氏曰斂者謂大祝衆祝之屬以其與亡者或有恩今手爲執事專心則增感故斂竟皆哭

### 士與其執事則斂

鄭氏曰斂者必使所與執事者不欲妄入褻之孔氏曰釋前士是斂義與執事謂平生曾與亡者共執事今與喪所則助斂若不經共執事則褻惡之不使斂焉

### 斂焉則爲之壹不食

孔氏曰生經有恩死又爲之斂爲之廢一食澄曰上言旣斂必哭蓋通爲大胥衆胥及士而言此言一不

食蓋專為士之生嘗共事死又與斂者言其情厚於大胥衆胥等也

### 凡斂者六人

孔氏曰凡者貴賤同也  
兩邊各三人故用六人

### 凡斂者袒遷尸者襲

鄭氏曰袒者於事便也孔氏曰凡斂謂執大小斂事  
事多故袒為便遷尸謂大斂於地乃遷尸入棺事少  
襲故

### 右記小斂大斂凡三節

小斂主人即位于戶內主婦東面乃斂卒斂主人馮之

踊主婦亦如之主人袒說髦括髮以麻婦人髻帶麻于

房中

馮音憑袒音但說它活切髦音毛髻側瓜切

孔氏曰此明人君大夫士小斂之節初時尸在牖下主人在尸東今小斂當戶內故主人在戶內稍東西面斂訖主人馮尸而踊主婦馮尸竟亦踊擯小斂主人不袒今方有事故袒衣也髻者幼時剪髮爲之至年長則垂著兩邊明人子事親恒有孺子之義若父死說左髦母死說右髦二親並死則並說之小斂竟喪事已成故說髦括髮以麻以用也人君小斂說髦竟括髮用麻士既小斂亦括髮但未說髦爾婦人髻亦用麻帶麻麻帶也謂婦人要經男子說髦括髮在東房婦人髻帶麻于西房與男子異處鄭氏曰士既殯說髦此云小斂蓋諸侯禮也士之既殯諸侯之小斂於死者俱三日婦人之髻帶麻于房中則西房也

天子諸侯有左右房呂氏曰婦人不俟男子襲經先帶麻者以其無絞帶布帶且質略少變故因襲而襲經也長樂黃氏曰士喪禮小斂馮尸主人括髮袒衆主人免于房婦人髻于室士喪禮記曰既馮尸主人絞帶衆主人布帶則小斂馮尸之後括髮免髻之時主人已絞帶衆主人已布帶婦人已帶麻特主人未襲經爾又喪服斬衰章疏云婦人亦有絞帶布帶以備喪禮呂氏云無絞帶布帶當考

徹帷男女奉尸夷于堂降拜

奉芳勇切

孔氏曰此明士之喪小斂訖徹帷夷尸之節初死恐人惡之故有帷小斂衣尸畢有飾故除帷也諸侯及大夫賁出乃徹帷見下文夷陳也小斂竟相者舉尸將出戶陳于堂孝子男女親屬扶捧之至堂也降下也適子下堂拜賓也鄭氏曰夷之言尸也於遷尸主人主婦以下從而奉之孝敬之心也方氏曰夷之爲

言移也亦以傷爲戒周官凌人大喪共夷盤冰所以寒其尸使勿傷曰夷牀曰夷衾皆以是山陰陸氏曰體魄降矣而謂之夷婉辭也若知氣有升無夷也

君拜寄公國賓大夫士拜卿大夫於位於士旁三拜夫人亦拜寄公夫人於堂上大夫內子士妻特拜命婦汜

拜衆賓於堂上

汜芳  
劍切

鄭氏曰衆賓謂士妻也尊者皆特拜拜士與其妻皆旅之孔氏曰此明小斂訖拜賓也君謂嗣君小斂畢尸出堂嗣君下堂拜寄公國賓並就其位鄉而拜之也大夫士是先君之臣同服斬衰小斂訖出庭列位故嗣君出拜之卿大夫則就其位鄉而拜之士賤不人人拜之每一面三拜士有三等故也旁猶面也夫

人拜於堂上婦人無下堂也大夫內子士妻夫人亦拜之卿妻曰內子大夫妻曰命婦不云命婦者見卿妻與命婦同也特拜命婦特猶獨也謂人人拜之尊故也拜內子亦然衆賓士妻賤故汜拜之亦旁三拜也此記唯舉君喪拜賓不云大夫士者文不具也大夫士之喪拜賓亦然故士喪禮謂主人拜賓大夫特拜士旅之是也以上皆皇氏說熊氏云大夫士拜卿大夫士者是卿大夫士家自遭喪小斂後拜卿大夫於位士旁三拜大夫內子士妻亦謂大夫士妻家自遭喪小斂後拜命婦及拜士妻之禮大夫士各自遭喪并言之者以大夫士家小斂後拜賓同故也此君大夫士之喪小斂後拜賓與上文未小斂時文類其義愈於

皇氏

主人卽位襲帶經踊母之喪卽位而免乃奠弔者襲裘

加武帶經與主人拾踊

免音問拾其刼切

鄭氏曰卽位阼階下之位也有襲經乃踊尊卑相變也母之喪卽位而免記異者禮斬衰括髮齊衰免以至成服而冠爲母重初亦括髮旣小斂則免乃奠小斂奠也始死者朝服裼裘如吉時小斂則改襲而加武與帶經矣武吉冠之卷也加武者明不改冠亦不免也檀弓曰主人旣小斂子游趨而出襲裘帶經而入孔氏曰主人拜賓時袒今拜畢襲衣加要帶首經於序東復位乃踊也士喪禮先踊乃襲經此先襲經乃踊士爲卑此據諸侯爲尊故注云尊卑相變爲父喪拜賓竟而卽阼階下位又序東帶經猶括髮若爲母喪至拜賓竟卽位時不復括髮以免代之免以襲經至大斂乃成服所以異於父也拜賓襲經踊竟後始設小斂之奠弔者襲裘加武者未小斂之前弔者裘上有裼衣上有朝服開朝服露裼衣今小斂之



後弔者以上朝服拵襲裘上裼衣也加武者主人既素冠素弁弔者故加素弁於武也帶經者帶謂要帶經謂首經以朋友之恩故加帶經若無朋友之恩則無帶唯經而已拾踊拾更也主人先踊婦人踊弔者踊三者三是與主人更踊也凶冠武與冠連不別有武免亦無武今云加武明不改作凶冠亦不作免也山陰陸氏曰鄭氏謂有襲經乃踊尊卑相變然則袒括髮括髮袒亦相變加武者不以居冠弔居冠屬武君喪虞人出木角狄人出壺雍人出鼎司馬縣之乃官代哭大夫官代哭不縣壺士代哭不以官君堂上二燭下二燭大夫堂上一燭下二燭士堂上一燭下一燭

鄭氏曰代更也未殯哭不絕聲爲其罷倦既小斂可爲漏刻分時而更哭也未給襲竈角以爲斛水斗壺

漏水之器也冬漏以火爨鼎沸而後沃之此挈壺氏所掌也屬司馬司馬涖縣其器大夫不縣壺下君也士代哭不以官自以親疏哭也燭所以照饌也滅燎而設燭孔氏曰此論君及大夫士小斂後代哭之異虞人主山澤之官故出木與角狄人樂吏主挈壺漏水之器故出壺雍人主亨飪故出鼎冬月水凍則漏遲無準故取鼎煖水用虞人木爨煮之也司馬夏官卿也其屬有挈壺氏故司馬自臨視縣漏器挈壺氏云凡喪縣壺以代哭者縣漏分時使均其官屬更次相代而哭也有喪則於中庭終夜設燎至曉滅燎而日光未明故須燭以照祭饌也

賓出徹帷哭尸于堂上主人在東方由外來者在西方諸婦南鄉

鄭氏曰賓出徹帷君與大夫之禮士卒斂卽徹帷由外來謂奔喪者也無奔喪者婦人猶東面孔氏曰賓出後乃除帷人君及大夫禮舒也哭尸以下通明小斂後尸出在堂時法哭尸于堂主人位在尸東婦人位在尸西如室中若於時有新奔喪從外來者則居尸西方欲異於在家也奔喪未小斂而至則在東方與在家同也諸婦南鄉謂主婦以下在家者婦人位本在西方東鄉今既有外新奔者故移避之而近北鄉南也

婦人迎客送客不下堂下堂不哭男子出寢門見人不哭其無女主則男主拜女賓于寢門內其無男主則女主拜男賓于阼階下子幼則以衰抱之人爲之拜爲後

者不在則有爵者辭無爵者人爲之拜在竟內則俟之

在竟外則殯葬可也喪有無後無無主

人爲云偏切下同竟與境同

鄭氏曰婦人所有事自堂及房男子所有事自堂及門非其事處而哭猶野哭也出門見人謂迎賓也拜者皆拜賓於位也爲後者有爵攝主爲之辭於賓爾不敢當尊者禮也孔氏曰此明小斂之後男主女主迎送弔賓及拜賓之位又廣明喪主不在之義婦人質故送迎敵者不下堂有君夫人弔則主婦下堂至庭稽顙而不哭也男子遭喪敵者來弔不出門若有君命則出門亦不哭也故士喪禮君使人弔徹帷主人迎于寢門外見賓不哭是也其無女主以下明喪無主使人攝者禮若有主則男主拜男賓女主拜女賓無女主則男主拜女賓于寢門內少遠階下而猶不出門也無男主則使女主拜男賓於阼階下位鄉

云女有下堂謂此也子雖幼小則以衰抱之爲主而代之拜賓也爲後者不在則有爵者辭謂主有官爵出行不在而家有喪其攝主無官爵則辭謝於賓云已無爵不敢拜賓也無爵者人爲之拜謂不在之主無官爵其攝主之人爲主拜賓也若主行近在竟內則俟其還乃殯葬若主在國外不可待則殯又不可待則葬可也喪有無後無主釋所以使人攝及以衰抱幼之義無主則對賓有闕故四鄰里尹主之無得無主也應氏曰有爵者來弔則辭謝不敢見重爵命也無爵者代之拜此有爵無爵蓋係於弔者而注以係於爲後不在之人理有不通人之於喪也惟其情之厚者則弔之初不視其爵之有無而爲攝主者亦通大夫士而言也大夫或弔於士士或弔於大夫其往來初無常而受弔者不拘爲後者之貴賤但弔者之至則隨其人而應之有所辭所拜之不同且攝主所以領賓而欲弔者之不虛辱爾若如注說則爲

後不在必身無爵者於凡有客始一例接之苟有爵則一例辭之是無事乎接賓也又何以攝主為在禮士不主大夫之喪士不攝大夫則有爵之喪必有爵者而後主之矣為主者有爵則受有爵之弔乃為相稱又何辭焉

### 右記小斂凡一節

君將大斂子弁經即位于序端卿大夫即位于堂廉楹西北面東上父兄堂下北面夫人命婦尸西東面外宗房中南面小臣鋪席商祝鋪絞紼衾衣士盥于盤上士舉遷尸于斂上卒斂宰告子馮之踊夫人東面亦如之

鋪普吳切

又音敷

鄭氏曰子弁經者未成服弁如爵弁而素大夫之喪  
子亦弁經孔氏曰此明君大斂之節成服則著喪冠  
弁經是未成服君大夫士皆然此雖謂大斂其小斂  
亦同也序謂東序端謂序之南頭卿大夫謂羣臣也  
堂廉謂堂基南畔廉稜之上楹謂南近堂廉者子位  
既在東序端故羣臣列於基上東楹之西也父兄諸  
父諸兄不仕者以其賤故在堂下鄉北以東爲上也  
若士亦在堂下外宗君之姑姊妹之女及姨舅之女  
也輕故在房中而御南鋪席謂下莞上簟敷於阼階  
上供大斂也商祝鋪絞紵衾衣等致于小臣所鋪席  
上以待尸也士亦喪祝之屬周禮喪祝上士二人中  
士四人下士八人將舉尸故先盥手于盤上也斂上  
卽斂處宰告者斂畢大宰告孝子也孝子得告  
馮尸而起踊夫人亦馮尸而踊馮竟乃斂於棺

大夫之喪將大斂既鋪絞衾衣君至主人迎先入門  
右巫止于門外君釋菜祝先入升堂君卽位于序端卿  
大夫卽位于堂廉楹西北面東上主人房外南面主婦  
尸西東面遷尸卒斂宰告主人降北面于堂下君撫之  
主人拜稽顙君降升主人馮之命主婦馮之

鄭氏曰先入右者入門而右也巫止者君行必與巫  
巫辟凶邪也釋菜禮門神也必禮門神者君非問疾  
弔喪不入諸臣之家也主人房外南面大夫之子等  
得升視斂也孔氏曰此明大夫斂節主人適子也出  
門迎君望見馬首不哭不拜先還入門右北面以待  
君至巫止門外者君臨臣喪巫祝桃茢至門恐主人



惡之且禮敬主人故不將巫入對尸柩巫止而祝代  
入故先君而入門升自阼階也君隨祝後而升堂卽  
位於東序之端阼階上之東是適子臨斂處也主人  
房外南面者鄉者在門右君升則主人亦升立君之  
北東房之外面向南俱欲視斂也遷尸者鄉鋪絞紼  
衾衣而君至今列位畢故舉尸于鋪衣上也主人得  
告斂畢降西階堂下鄉北立待君也君臣情重方爲  
分異故斂竟君以手撫按尸與之別主人見君撫尸  
故在堂下拜稽顙以禮君之恩君降者撫尸畢而下  
堂也升主人者君命升之也主人升自西階由足西  
面馮尸不當君所君又命主婦馮之士喪  
禮子不得升大夫之子尊得升視斂也

士之喪將大斂君不在其餘禮猶大夫也

鄭氏曰其餘謂卿大夫及主婦之位孔氏曰此明士  
斂之節士卑君不視斂故君不在其餘鋪衣列位男

女之儀悉  
如大夫也

鋪絞綵踊鋪衾踊鋪衣踊遷尸踊斂衣踊斂衾踊斂絞

綵踊

孔氏曰此明孝子貴賤踊節澄曰貴賤謂君大夫士之禮皆同大斂當此之節則孝子必踊也

君撫大夫撫內命婦大夫撫室老撫姪娣君大夫馮父  
母妻長子不馮庶子士馮父母妻長子庶子庶子有子  
則父母不馮其尸凡馮尸者父母先妻子後君於臣撫  
之父母於子執之子於父母馮之婦於舅姑奉之舅姑

於婦撫之妻於夫拘之夫於妻於昆弟執之馮尸不當

君所凡馮尸興必踊

拘音俱又古侯切

鄭氏曰撫以手按之也內命婦君之世婦馮謂扶持服膺也君於臣撫之至夫於妻於昆弟執之此恩之深淺尊卑之儀也馮之類必當心馮尸不當君所不敢與尊者所馮同處也凡馮尸必坐興必踊悲哀之至孔氏曰此明撫尸馮尸之節大夫貴故君自撫之大夫以室老爲貴臣以姪娣爲貴妾死則爲之服故並撫之也君大夫自主父母妻長子四人喪故同馮之馮父母撫妻子并云馮通言爾士賤故馮及庶子無子者君大夫庶子雖無子不得馮也凡馮尸者凡主人也父母先妻子後謂尸之父母妻子也君尊於臣但以手撫按尸心身不服膺也父母於子執之當心上衣也子於父母馮之服膺心上也婦於舅姑尊

故奉當心上衣也舅姑於婦亦手按尸心與君爲臣  
同也妻於夫拘之微引心上衣輕於馮重於執也夫  
於妻於昆弟亦執心上衣也不當君所者君已馮心  
則餘人馮者宜少辟之凡馮尸必哀殯故起必踊泄  
之馮者爲重奉次之拘次之執次之尊者則馮奉卑  
者則撫執執雖輕於撫而恩深故君於臣撫父母於  
子執是兼有尊卑深淺也士喪禮君坐撫當心此云  
馮尸不當君所明君不撫得當君所也澄曰總言之  
皆謂之馮尸分言之則有馮奉拘撫執五者之異撫  
在拘執之間山陰陸氏曰言執若不能拾也言奉若  
舅姑在焉拘之婦人  
從一若猶有所拘焉

### 右記大斂凡一節

君於大夫世婦大斂焉爲之賜則小斂焉於外命婦既

加蓋而君至於士既殯而往爲之賜大斂焉

方氏曰小斂在先大斂在後喪事以速爲敬故大斂而往者禮之常小斂而往者爲之賜也鄭氏曰爲之賜謂有恩惠也加蓋而至於臣之妻略也孔氏曰君於大夫大斂是常小斂是恩賜世婦謂內命婦爲之恩賜則小斂而往君於外命婦恩輕故旣大斂入棺加蓋之後而君至也

夫人於世婦大斂焉爲之賜小斂焉於諸妻爲之賜大斂焉於大夫外命婦既殯而往

孔氏曰於諸妻謂姪娣及同姓女也同士禮故爲之賜大斂焉若夫人姪娣尊同世婦當大斂爲之賜小斂焉夫人於大夫及外命婦既殯而往但有一禮無恩賜差降之事也

大夫士既殯而君往焉使人戒之主人具殷奠之禮俟于門外見馬首先入門右巫止于門外祝代之先君釋菜于門內祝先升自阼階負墉南面君卽位于阼小臣二人執戈立于前二人立于後擯者進主人拜稽顙君稱言視祝而踊主人踊大夫則奠可也士則出俟于門外命之反奠乃反奠卒奠主人先俟于門外君退主人送于門外拜稽顙

鄭氏曰殷猶大也朝夕小奠至月朔則大奠君將來則具大奠之禮以待之縗君之來也祝負墉南面直

君北房戶東也小臣執戈先後君君升而夾階立大夫殯卽成服成服則君亦成服錫衰而往弔之擯者進當贊主人也始立門東北面稱言舉所以來之辭也視祝而踊祝相君之禮當節之也迎不拜拜送者拜迎則爲君之答己孔氏曰君於大夫雖視大斂或有旣殯之後而始往與士同也君將往使人豫戒主人主人重君之來先備月朔大奠之禮待于門外見君馬首先君而入祝先道君升阼階在君之北立於房戶之東皆負壁而鄉南墉壁也君位于阼者主人不敢有其室也執戈辟邪氣也擯者進于孝子前告使行禮喪贊曰相此云擯者以君之弔禮故以擯言主人于庭中北面拜而稽顙君舉弔辭祝以相君先踊君乃視祝而踊君踊畢主人乃踊君來弔士與大夫具禮不同大夫者君旣在阼主人在庭踊畢則釋此殷奠于殯可也言對入君可爲此奠士卑不敢留君待奠故先出俟君子門外君使人命反說奠士乃

反入設奠主人奠畢又先出門待君  
君退主人門外送之而拜大夫士同

夫人弔於大夫士主人出迎于門外見馬首先入門右  
夫人入升堂卽位主婦降自西階拜稽顙于下夫人視  
世子而踊奠如君至之禮夫人退主婦送于門內拜稽  
顙主人送于大門之外不拜

鄭氏曰視世子而踊世子從夫人夫人以爲節也世  
子之從夫人位如視從君孔氏曰孝子迎君之妻亦  
如迎君禮先入門右門亦大門也主婦臣妻也夫人  
來弔故婦人爲主人世子夫人之世子隨夫人來也  
夫人來弔則世子在前道引其禮奠如君至之禮者  
亦先戒乃具殷奠夫人卽位哭後主婦拜竟而設奠



事如君弔禮主婦送于門內門寢門也婦人迎送不出門故夫人去於路寢門內拜送之主人送于大門外喪無二主主婦已拜故主人不拜應氏曰君臣之際猶家人也君於外內婦既殯往夫人於大夫士之家亦往弔之主人迎而先入門右夫人升而自阼階待夫人猶待君也主婦拜稽顙於下執妾禮猶臣禮也夫人之行世子實道之君視祝而踊夫人則視世子而踊也退則送于門外婦人迎送不下堂而待至門者爲所尊變也其來也主人迎于門外送亦如之所以代主婦而伸敬也門外者男子之所有事婦人迎送不出門雖對所尊而不敢變也

大夫君不迎于門外入卽位于堂下主人北面衆主人南面婦人卽位于房中若有君命夫命婦之命四鄰

# 賓客其君後主人而拜

鄭氏曰人卽位於下不升堂而立阼階之下西面下  
正君也衆主人南面於其北婦人卽位於房中君雖  
不升堂猶辟之也後主人而拜者將拜賓使主人陪  
其後而君前拜不俱拜者主人無二也孔氏曰大夫  
下臣稱大夫爲君故曰大夫君不迎于門外貶於正  
君也主人北面者其君卽阼階下位故適子辟之所  
以在君之南北面也婦人之位在堂君雖不升堂猶  
辟於房中正君來禮亦如此不言大夫君之妻來者  
當同夫人禮也前君臨大斂云主婦尸西以大斂哀  
深故不辟君今謂殯後也當此大夫君來弔時或有  
本國之君或有國中大夫命婦之命或有昔經使四  
鄰之國卿大夫遣使來弔若有此諸賓在庭則此大  
夫君代主人拜命及拜賓以喪用尊者拜賓故也然  
大夫君不敢同於國君專代爲主故以主人陪置君

之後君先拜主人  
後拜不同時拜也

大夫士若君不戒而往不具殷奠君退必奠

孔氏曰君來不先戒當時雖不得殷奠君  
去後必設殷奠告殯鄭氏曰榮君之來也

君弔見尸柩而后踊

鄭氏曰君弔塗之後雖往不踊皇氏曰前文  
既殯君往視祝而踊謂既殯未塗得有踊也

君弔則復殯服

鄭氏曰謂臣喪既殯後君乃始來弔復反也反其未  
殯未成服之服新君事也復或爲服孔氏曰臣喪大  
斂與殯之時君有故不得來至殯後主人已成服而  
君始來弔于時主人則復殯時未成服之服其服直

經免布深衣也不散帶爲人君  
變貶於大斂之前既啓之後也

君於大夫疾三問之在殯三往焉士疾壹問之在殯壹

往焉

鄭氏曰所以致殷勤也應氏曰古之君臣猶一體也  
頭目手足疾痛慘楚彼此無不相應君臣猶一家也  
父兄子弟吉凶休戚上下無不相關視之如一體故  
疾則君三問再問喪則君或撫或踊真若吾手足之  
虧折焉視之如一家故君喪則大夫士位乎東世婦  
士妻位乎西不翅父兄之痛也及臣之有故則君視  
之夫人視之世子視之  
真若子弟之失亡焉

右記弔臨凡一節

君大棺八寸屬六寸槨四寸上大夫大棺八寸屬六寸

下大夫大棺六寸屬四寸士棺六寸

屬音燭槨  
步歷切

鄭氏曰大棺棺之在表者也檀弓曰天子之棺四重水兕革棺被之其厚三寸衾棺一槨棺二四者皆周此以內說而出也然則大棺及屬用槨槨用衾以是差之上公革棺不被三重也諸侯無革棺再重也大夫無槨一重也士無屬不重也庶人之棺四寸上大夫謂列國之卿也趙簡子云不設屬槨時僭也孔氏曰天子四重之棺大棺八寸屬六寸槨四寸水兕革棺共六寸合厚二尺四寸也上公棺則去水皮所餘三重合厚二尺一寸侯伯子男則又去兕皮但餘三棺爲二重合厚一尺八寸也上大夫去槨四寸所餘大棺八寸屬六寸爲一重合厚一尺四寸下大夫大棺與屬各減二寸厚一尺也士則不重唯大棺六寸

檀弓從內而說以次出外此先云大棺及屬乃始云裨是從外向內而說

君裏棺用朱綠用雜金錯大夫裏棺用玄綠用牛骨錯

士不綠錯

子南切

孔氏曰裏棺謂以繒貼棺裏也以朱繒貼四方綠繒貼四角錯釘也雜金錯者尚書云貢金三品黃白青色舊說云用金釘又用象牙釘雜之以琢朱綠著棺也大夫四面玄四角綠用牛骨錯不用牙金也士悉用玄亦用牛骨錯定本綠字皆作琢琢謂錯琢朱繒貼著於棺也澄按定本近是蓋裏棺兼用綠色無義疏說分二色貼四面貼四隅亦無義且未詳何據若依定本以綠爲琢則朱玄句絕琢字屬下句士用玄裏棺與大夫同但不

用釘琢之爲異爾

君蓋用漆三衽三束大夫蓋用漆二衽二束士蓋不用漆二衽二束

鄭氏曰用漆者塗合北牡之中衽小要也孔氏曰用漆謂漆其衽合縫處也衽爲燕尾合棺縫際也束謂以皮束棺也棺兩邊各三衽每當衽上輒以牛皮束之故云三衽三束大夫士橫衽有二每衽有束故云二衽二束士卑不用漆衽束與大夫同

君大夫髻爪實于綠中士埋之

髻音舜

鄭氏曰綠當爲角聲之誤也角中謂棺內四隅也髻亂髮也將實爪髮棺中必爲小囊盛之此綠或爲簍孔氏曰綠卽棺角士賤以物盛髮爪而埋之澄按古讀角盧谷切與綠同音同聲故誤用綠字簍魯口切

與角雖不同聲而亦同音也或謂綠卽綠貼棺中四角之處故云綠中此說似可通但上文若依定本改綠爲琢則又不然矣且當從鄭注爲角

○君殯用輜櫨至于上畢塗屋大夫殯以幬櫨置于西

序塗不暨于棺士殯見衽塗上帷之

輜勑倫切櫨才完切幬音道暨其器

切

鄭氏曰櫨猶蔽也屋殯上覆如屋者也幬覆也暨及也此記參差以檀弓參之天子之殯居棺以龍輜櫨未題漆象椁上四注如屋以覆之盡塗之諸侯輜不畫龍櫨不題漆象椁其它亦如之大夫之殯廢輜置棺西牆下就牆櫨其三面塗之不及棺者言櫨中狹小裁取容棺惟之鬼神尚幽暗也士達於天子皆然



孔氏曰凡殯之禮天子先以龍輅置於客位殯處然後從阼階舉棺於輅中輅外以木蔽聚輅之四邊木高於棺乃從上加綃繡於棺上然後以木題湊題頭也湊鄉也謂以木頭相湊鄉內也象椁上之四注以覆之如屋形以泥塗之於屋之上又加席三重於殯上其諸侯殯時則置棺輅內亦蔽木輅外木高於棺後加布幕於棺上又蔽木於塗上雖不題湊象椁亦中央高似屋形但不爲四注大夫殯以幃謂棺衣幃覆之大夫幃覆則王侯並幃覆也西序屋堂西頭壁也大夫不輅又不四面幃以一面倚西壁而三面幃之又上不爲屋也塗不暨于棺王侯塗之而幃廣去棺遠大夫幃狹裁使塗不及棺爾士掘肆見衽其衽之上出之處亦以木覆上而塗之故謂塗上惟幃也朝夕哭乃徹帷

○熬君四種八筐大夫三種六筐士二種四筐加魚腊

焉熬五羔切種章  
勇切腊音昔

鄭氏曰熬者煎穀也將塗設於棺旁所以惑蚍蜉使不至棺也士喪禮曰熬黍稷各二筐又曰設熬旁一筐大夫三種加以粱君四種加以稻四筐則首足皆一其餘設於左右孔氏曰火熬其穀使香欲使蚍蜉聞其香氣食穀不侵尸也魚腊謂乾腊特牲士腊用兔少牢大夫用麋天子諸侯無文當用六獸之屬亦爲惑蚍蜉

○飾棺君龍帷三池振容黼荒火三列黻三列素錦褚加僞荒纁紐六齊五采五貝黼嬰二黻嬰二畫嬰二皆戴圭魚躍拂池君纁戴六纁披六大夫畫帷二池不振

容畫荒火三列黻三列素錦褚纁紐二玄紐二齊三采  
三貝黻嬰二畫嬰二皆戴綏士戴前纁後緇二披用纁  
玄披亦如之士布帷布荒一池揄絞纁紐二緇紐二齊  
三采一貝畫嬰二皆戴綏士戴前纁後緇二披用纁

音黻

弗褚張呂切僞鄭注讀爲帷齊如字又才細切嬰  
所甲切戴丁代切披彼義切綏讀爲綏揄音遙

鄭氏曰飾棺者以華道路及壙中不欲衆惡其親也  
荒蒙也在旁曰帷在上曰荒皆所以衣柳也士布帷  
布荒者白布也君大夫加文章焉黼荒緣邊爲黼文  
畫荒緣邊爲雲氣火黻爲列於其中爾僞當爲帷或  
作于聲之誤也大夫以上有褚以襯覆棺乃加帷荒  
於其上紐所以結連帷荒者也池以竹爲之如小車

苓衣以青布柳象宮室縣池於荒之爪端若承雷然  
云君大夫以銅爲魚縣於池下揄揄翟也青質五色  
畫之於絞繒而垂之以爲振容象水草之動搖行則  
又魚上拂池雜記曰大夫不揄絞屬於池下是不振  
容也士則去魚齊象車蓋縫合雜采爲之形如瓜  
分然綴貝落其上及旁戴之言值也所以連繫棺束  
與柳材使相值因而結前後披也漢禮嬰以木爲筐  
廣三尺高二尺四寸方兩角高衣以白布畫者畫雲  
氣其餘各如其象柄長五尺車行使人持之而從旣  
定樹於壙中檀弓曰周人牆置嬰是也綏當爲綏讀  
如冠蕤之蕤蓋五采羽注於嬰首也孔氏曰惟柳車  
還障也王侯畫龍以象君德池者織竹爲籠挂於荒  
之爪端象平生宮室有承雷也天子生有四注屋四  
面承雷柳亦四池諸侯屋亦四注而柳降一池闕於  
後一故三池也振容者振動也容飾也以絞繒爲之  
長丈餘如幡畫幡上爲雉縣於池下爲容飾車行則

幡動也黼荒火三列黻三列者荒謂柳車上覆鼈甲也緣荒邊爲白黑黼文於黼文之上荒之中央又畫火黻各三行列行也火形如半環黻兩已相背也素錦褚者素白也褚屋也於荒下用白錦爲屋在路象宮室也加爲荒者惟是邊牆荒是上蓋褚覆竟而加惟荒於褚外也纁組六者上蓋與邊牆相離故以纁爲紐連之旁各三凡六也齊五米五具者鼈甲上當中形圓如車蓋高三尺徑二尺餘凡車蓋四面有垂下黹今此齊形上象車蓋旁象蓋黹上下縫合五米繪列行相次如瓜內之子以穰爲分限又連貝爲五行交絡齊上也黼翼二黻翼二畫翼二皆戴圭者翼形似扇在路則障車入樽則障柅二畫黼二畫獸二畫雲翼兩角皆戴圭玉禮器云天子八翼諸侯六大夫四魚躍拂池者凡池必有魚故此車池縣振容又縣銅魚於振容間若車行則魚跳躍上拂池也君纁戴六纁披六者事異飾棺故更言君也棺橫東有三

每束兩邊屈皮爲紐三束有六紐用纁帛戴索連繫棺束之紐與外畔柳材便相當值謂連棺著柳故有六戴纁披亦用絳帛爲之將一頭結此戴出一頭於帷外人牽之每戴繫之故亦有六也謂之披者若牽車登高則引前以防軒車適下則引後以防翻車敬左則引右敬右則引左使車不傾覆也大夫帷畫雲氣二池前後各一池或云兩邊而已畫荒謂畫雲氣火黻錦褚與君同紐用四不一色故二纁二玄也齊三采降黃黑也貝亦降二也嬰降兩鬪嬰角不圭止用五采羽作綏無絞雉而有魚躍拂池戴不並用纁其數與披同四也士唯一池在前亦畫掄雉於絞在於池上紐降用玄緇四紐連四旁也與大夫同一貝者一行絡之爾嬰降二黻前纁後緇者戴當棺束通兩邊爲四戴也二披用纁通兩旁則亦四披也山陰陸氏曰天子八嬰皆戴璧諸侯六嬰皆戴圭大夫四嬰士二嬰皆戴綏戴玉者必戴綏戴綏者不必戴玉

綏旒也

君葬用輜四綳二碑御棺用羽葆大夫葬用輜二綳二

碑御棺用茅士葬用國車二綳無碑比出宮御棺用功

布

輜鄭注音輕市專切下同王如字綳音弗比必利切

鄭氏曰大夫廢輜此言輜非也輜當為輕聲之誤也輕字或作團是以又誤為國輕車輕車也尊卑之差也在棺曰綳行道曰引至廣將寢又曰綳而設碑是以連言之碑桓楹也御棺居前為節度也士言比出宮用功布則出宮而止至壙無矣綳或為牽孔氏曰此明葬時在路尊卑戴柩之車及碑綳之等輜國皆當為輕輕則蜃車在路戴柩尊卑同用蜃車諸侯綳有四條碑有二所天子則六綳四碑羽葆以鳥羽注

於柄末如蓋而御者執之大夫二綈二碑碑各一孔  
樹於壙之前後綈各穿之也士二綈無碑手縣下之  
大夫用茅自廟至墓士卑御自廟至大門牆內而止  
出路便否至墓不復御也羽葆功布等其象皆如麾  
此論在道之時未論寔時當云引而云綈與碑者初  
在塗後遂寔故鄭云連言之至寔時下棺天子殯用  
龍輴至壙去蜃車更載以龍輴以此約之諸侯殯以  
輴葬用輅明矣大夫朝廟用輴殯與葬不用輴也士  
朝廟得用輅軸若天子元士葬亦用輅軸天子用大  
木爲碑謂之豐碑諸侯則樹兩大大木爲碑謂之桓楹  
此稱君二綈二碑謂  
每一碑樹兩楹也

凡封用綈去碑負引君封以衡大夫士以咸君命毋諱  
以鼓封大夫命毋哭士哭者相止也

封鄭作寔咸鄭  
讀爲緘諱音華



鄭氏曰封周禮作窆窆下棺也封或皆作斂檀弓曰公輸若方小斂般請以機封謂此斂也然則棺之入坎爲斂與斂尸相似咸讀爲緘凡柩車及壙說載除飾而屬紼於柩之緘又樹碑於壙之前後以紼繞碑間之鹿盧輓棺而下之此時棺下窆使輓者皆繫紼而繞要負引舒縱之備失脫也用紼去碑者謂縱下之時也衡平也人君之喪又以木橫貫緘耳居旁持而平之又繫鼓爲縱舍之節大夫士旁牽緘而已庶人縣窆不引紼也禮唯天子葬有隧齊人謂棺束爲緘繩咸或爲緘孔氏曰此論尊卑下棺之制至壙說載除飾之後解此屨車之紼以繫於柩束之繩又將一頭繞碑間鹿盧所引之人在碑外背碑而立負引者漸漸應鼓聲而下故云用紼去碑負引也諸侯禮大物多棺重恐柩不正下棺之時別以大木爲衡貫穿棺束之緘平持而下備傾頓也大夫士無衡使人以紼直繫棺束之緘下於君也君下棺時命令衆

人無得喧譁以鼓爲縱舍之節每一鼓漸縱縛也大  
夫卑直命人使無哭耳士又卑哭者自相止也諸侯  
四縛二碑前後二縛各繞前後二碑之鹿盧其餘兩  
縛於壙之兩旁人輓之而下也天子則六縛四碑前  
後各重鹿盧每一碑用二縛前後用四縛其餘兩縛  
繫於兩旁之碑諸侯不重鹿盧前碑後碑各一縛其  
餘二縛在旁人持而下棺耳經云用縛  
去碑謂前後縛耳在旁之縛無碑也

### 君松槨大夫柏槨士雜木槨

鄭氏曰槨謂周棺者也天子柏棺以端長六尺夫子  
制於中都使庶人之槨五寸五寸謂端方也此謂等  
者用大材卑者用小材耳自天子諸侯卿大夫士庶  
人六等其槨長自六尺而下其方自五寸而上未聞  
其差所定也抗木之厚蓋與槨方齊天子五重上公  
四重諸侯三重大夫再重士一重孔氏曰諸侯用松

心爲椁材大夫以柏爲椁不用松心士又卑用雜木也按檀弓柏椁以端長六尺注云其方蓋一尺以此差之諸侯方九寸卿方八寸大夫七寸士六寸庶人五寸雖有此約無正文可定也

棺椁之間君容柩大夫容壺士容甒

柩昌六切甒音武

鄭氏曰間可以藏物因以爲節孔氏曰此明棺椁之間廣狹所容柩如漆桶是諸侯棺椁所容也壺是漏水器大夫所掌甒盛酒之器士所用也方氏曰柩方二尺四寸深一尺八寸壺大一石甒五斗則其所容之大小可知君必以柩與狄人設階同義

君裏椁虞筐大夫不裏椁士不虞筐

鄭氏曰裏椁之物虞筐之文未聞也澄曰此蓋言君之椁有物裏之而又有虞筐太夫雖不裏椁而猶有

虞筐也士則  
并虞筐亦無

### 右記殯葬凡四節

君之喪三日子夫人杖五日既殯授大夫世婦杖子大  
夫寢門之外杖寢門之內輯之夫人世婦在其次則杖  
卽位則使人執之子有王命則去杖國君之命則輯杖  
聽卜有事於尸則去杖大夫於君所則輯杖於大夫所  
則杖

輯側立切  
去起呂切

鄭氏曰三日者死之後三日也爲君杖不同日人君  
禮大可以見親疏也輯斂也斂者謂舉之不以拄地

也夫人世婦次於房中卽位堂上堂上近尸殯使人執杖不敢自持也子於國君之命輯杖下成君不敢敵之也卜卜葬卜日也凡喪祭虞而有尸大夫於君所輯杖謂與之俱卽寢門外位也獨馬則杖君謂子也於大夫所杖俱爲君杖不相下也孔氏曰此人君禮也子杖通女子在室者若嫁爲它國夫人則不杖嫁爲卿大夫妻同五日杖也喪服四制七日授士杖君之女及內宗外宗嫁爲士妻及女御皆七日杖也子大夫子兼適庶及世子寢門殯宮門也子大夫廬在寢門外得待杖拄地行以至寢門殯柩在門內神明所在敵入門輯斂之不敢拄地也若庶子至寢門則去杖不得持入此大夫與子同者謂大夫特來不與子相隨也若與子相隨子杖則大夫輯子輯則大夫去杖下文云大夫於君所輯杖是也夫人世婦在其次則杖者次謂西房居喪之地則得持杖拄地卽位則使人執之以堂上有殯也子有王命去杖者世

子尊天子之命對之不敢杖也國君之命輯杖謂鄰國使人來弔世子未敢比成君故斂杖也有事於尸謂虞及卒哭耐祭敬卜及尸故去杖也大夫於君所輯杖者君謂世子前云子後云君嫌是別人故鄭云君謂子也若大夫與世子俱在門外位則大夫輯杖敬嗣君也大夫與大夫俱在門外是兩大夫相對同爲君杖不相降故並得杖拄地也

大夫之喪三日之朝既殯主人主婦室老皆杖大夫有君命則去杖大夫之命則輯杖內子爲夫人之命去杖

爲世婦之命授人杖

朝如字爲云僞切

鄭氏曰大夫有君命去杖此指大夫之子也而云大夫者通實大夫有父母之喪也授人杖與使人執之

同也孔氏曰此明大夫杖節大夫死後三日既殯應杖者悉杖也大夫嗣子而云大夫者兼通子爲大夫有父母喪也有君命則去杖對君命亦然也大夫之命謂嗣子對彼大夫之使則斂杖自卑下也兩大夫自相對則不去杖內子卿妻也有夫及長子喪君夫人有命弔已則去杖若有君之世婦命弔內子敬之則使人執杖以自隨卑於夫人故隨而不去也記云大夫之喪不舉命婦而舉內子卿妻者互文也欲見卿喪與大夫同山陰陸氏曰內子爲夫人之命去杖輯杖於此取中焉在去杖與杖之間爲世婦之命授人杖不言使人執之卑也

士之喪二日而殯三日之朝主人杖婦人皆杖於君命夫人之命如大夫於大夫世婦之命如大夫

鄭氏曰士二日而殯者下大夫也士之禮死與往日  
生與來日此二日於死者亦得三日也婦人皆杖謂  
主婦容妾爲君女子子在室者孔氏曰此明士之杖  
節二日而殯除死日爲二日也三日殯之明日也士  
之子於君命其妻於夫人之命如大夫禮皆去杖也  
若士之子於大夫之命其妻於世婦之命如大夫於  
大夫之禮大夫之命則輯杖世婦之命則授人杖也

### 子皆杖不以卽位

孔氏曰皇氏云子謂大夫士之庶子也不以杖卽位  
避適子也人君適子入門輯杖猶得卽位庶子宜在  
門外之位去之故無卽門外之位禮也大夫士之適  
子則得哭殯哭柩如下所說其庶子則宜與人君之  
庶子同並不得以杖卽位言與去杖同不得輯  
也鄭氏曰子謂凡庶子也不以卽位與去杖同



大夫士哭殯則杖哭柩則輯杖

孔氏曰大夫士謂大夫士之適子既攢塗之後哭殯可以杖將葬既啓之後對柩爲尊則斂去其杖鄭氏曰哭殯謂既塗也哭柩謂啓後也大夫士之子於父父也尊近哭殯可以杖天子諸侯之子於父父也君也尊遠杖不入廟門

弃杖者斷而弃之於隱者

斷當管切

鄭氏曰杖以喪至尊爲人得而褻之也孔氏曰杖雖大祥弃之猶恐人褻慢斷之不堪它用弃於幽隱之處使不穢汚

右記喪杖凡一節

君之喪子大夫公子聚士皆三日不食子大夫公子聚士食粥納財朝一溢米莫一溢米食之無筭士䟽食水飲食之無筭夫人世婦諸妻皆䟽食水飲食之無筭

音食

嗣

鄭氏曰納財謂食穀也二十兩曰溢於粟米之法一溢爲米一升二十四分升之一諸妻御妻也同言無筭則是皆一溢米或粥或飯孔氏曰此明君喪食之禮財謂穀也每日納所食之米朝唯一溢莫唯一溢作之無時常須豫納故云納財按律厯志合命爲合則二十四銖合重一兩十合爲一升升重十兩二十兩曰溢則米二升與此不同古秤有二法說左傳者云百二十斤爲石則一斗十二斤爲一百九十二兩

一升爲十九兩有奇今一兩爲二十四銖則二十兩爲四百八十銖計十九兩有奇爲一升則總有四百六十銖八參以成四百八十銖唯有十九銖二參在是爲米一升二十四分升之一此大略而言之也居喪因病不能頓食隨須則食故云無筭士賤病輕故疏食疏麤也食飯也麤米爲飯亦水爲飲夫人世婦諸妻皆婦人質弱恐食粥傷性故言疏食水飲也

大夫之喪主人室老子姓皆食粥衆士疏食水飲妻妾疏食水飲士亦如之

鄭氏曰室老其貴臣也衆士所謂衆臣士亦如之如其子食粥妻妾疏食水飲孔氏曰此大夫禮也子姓謂孫也不云衆子主人中兼之按喪服傳云卿大夫室老子貴臣其餘皆衆臣按檀弓主人主婦歡粥主

婦謂女  
主也

既葬主人疏食水飲不食菜果婦人亦如之君大夫士  
一也練而食菜果祥而食肉

孔氏曰此明君大夫士既葬至練祥之食節既葬哀  
殺可以疏食不復用一溢米也鄭氏曰果瓜桃之屬

食粥於盛不盥食於簋者盥食菜以醯醬始食肉者先

食乾肉始飲酒者先飲醴酒

簋悉  
管切

鄭氏曰盛謂今時杯杆也簋斚管也斚者不盥手飯  
者盥孔氏曰此明食之雜禮斚粥不用手故不盥以  
手就簋取飯故盥也練而食菜果者食之時以醯醬  
也始食肉始飲酒謂祥後也然閭傳曰父母之喪大

祥有醯醬禪而飲醴酒二文不同蓋記者所聞之異  
熊氏云此據病而不能食者練而食醯醬祥而飲酒  
也

期之喪三不食食蔬食水飲不食菜果三月既葬食肉  
飲酒期終喪不食肉不飲酒父在爲母爲妻

孔氏曰期之喪謂大夫士旁期之喪三不食者謂義  
服其正服則二日不食見間傳鄭氏曰食肉飲酒亦  
謂既葬澄曰上言期之喪者謂不杖期下  
言父在爲母爲妻者謂杖期故不同也

九月之喪食飲猶期之喪也食肉飲酒不與人樂之

音樂

洛

孔氏曰此論大功喪食之節猶期之喪謂事同期也

五月三月之喪壹不食再不食可也比葬食肉飲酒不

與人樂之

比必利切

孔氏曰此明五月三月喪食之節壹不食謂總麻再不食謂小功容殤降之總麻再不食義服小功壹不食故總

并言之

叔母世母故主宗子食肉飲酒

鄭氏曰義服恩輕也言故主者關大夫君也孔氏曰若是諸侯當云舊君主者大夫之稱也

不能食粥羹之以菜可也有疾食肉飲酒可也五十不

成喪七十唯衰麻在身

卷十

鄭氏曰性不能食粥可食飯菜羹有疾食肉飲酒爲其氣微不成喪成猶備也所不能備謂不致毀不散送之屬也七十居處飲食與吉時同

既葬若君食之則食之大夫父之友食之則食之矣不

辟梁肉若有酒醴則辭

君食音嗣下父之友食之皆同辟音避

鄭氏曰尊者之前可以食美也變於顏色亦不可孔氏曰已有喪尊者賜食葬後情殺可從尊者奪也君食之謂君食臣也大夫謂大夫食士也父友謂父同志也其人並尊若命之食則可從之食也雖以梁米之飯及肉命食孝子食之若飲酒醴則變見顏色故辟而不飲

右記喪食凡一節

父母之喪居倚廬不塗寢苦枕由非喪事不言君爲廬

宮之大夫士檀之

苦始占切枕之鳩切  
由苦內切檀音善

鄭氏曰宮謂園障之也檀袒也謂不障孔氏曰此論  
君大夫士初遭喪居廬之禮廬者中門之外東牆下  
倚木爲廬以草夾障不以泥塗之也孝子居於廬中  
寢卧於苦頭枕於由若非喪事口不言說君廬外以  
帷障之如宮牆大夫士  
具廬袒露不帷障也

既葬拄楣塗廬不於顯者君大夫士皆宮之

拄張主切  
楣音眉

鄭氏曰不於顯者不塗見面孔氏曰既葬情殺故拄  
楣稍舉以納日光又以泥塗辟風寒不塗廬外顯處



也既葬故大夫士得宮之

凡非適子者自未葬以於隱者爲廬

適音的

孔氏曰凡非適子謂庶子也既非喪主故於東南角隱映處爲廬鄭氏曰於隱者爲廬不欲人屬目蓋廬

於東南角

既葬猶然

既葬與人立君言王事不言國事大夫士言公事不言

家事

鄭氏曰此常禮也孔氏曰此明居喪常禮未葬不與人並立君諸侯也王天子也既葬可並立則諸侯可言天子事猶不私言己國事公君也大夫士亦得言君事未可言私事曾子問練不羣立據無事之時此

有事須言故  
與人立也

君既葬王政入於國既卒哭而服王事大夫士既葬公

政入於家既卒哭弁經帶金革之事無辟也

辟音避

鄭氏曰此權禮弁經帶者變喪服而弔服輕可以卽  
事也孔氏曰國家有事孝子不得遵常禮故從權也  
葬竟未卒哭王事入於己國既卒哭則出爲王服金  
革之事公政謂國之政令入大夫家卒哭則有變服  
今服弔服以從金革之事無所辟也變服重弔服輕  
故從戎便國君當亦弁經也然此云弁經帶弁經謂  
弔服帶謂喪  
服異凡弔也

既練居堊室不與人居君謀國政大夫士謀家事

堊烏路烏

角二切

孔氏曰練後漸輕故君大夫士得謀己國家事也方氏曰既練君謀國政異乎既葬之不言國事矣大夫士謀家事異乎既葬之不言家事矣或言政或言士者主在上則曰政兼在下則曰事

既祥黝堊禭而外無哭者禭而內無哭者樂作矣故也

黝於糾切  
禭大感切

方氏曰黝堊蓋潔其地使微青塗其牆使純白以吉之先見故致飾以變其凶若既練所居之室以堊則以表哀素之心爾非致飾也鄭氏曰黝堊堊室之飾也地謂之黝牆謂之堊外無哭者於門外不哭也內無哭者入門不哭也禭踰月而可作樂樂作無哭者孔氏曰祥大祥也黝黑也平治其地令黑也堊白也

新塗堊牆壁令白稍飾故也外郎中門外堊室中也祥之日鼓素琴故中門外不哭若有弔者則入卽位哭也內中門內也禫已縣八音於庭是樂作矣故門內不復哭也鄭注禫踰月定本禫作祥

### 禫而從御吉祭而復寢

鄭氏曰從御御婦人也復寢不復宿殯宮也孔氏曰吉祭而復寢者謂禫祭之後同月之內值吉祭之節行吉祭訖而復寢不待踰月若不當四時吉祭則待踰月吉祭乃復寢按間傳既祥復寢謂不宿中門外復於殯宮之寢此復寢謂平常之寢文同義別故鄭云不復宿殯宮也

### 期居廬終喪不御於內者父在爲母爲妻

此期杖期也故終喪不御於內與不杖期不同

齊衰期者大功布衰九月者皆三月不御於內

此期不杖期也故與大功九月者同皆三月不御於內而已然蓋亦旁親之不杖期爾若正統之不杖期當與上文杖期者同

婦人不居廬不寢苦喪父母既練而歸期九月者既葬而歸

鄭氏曰歸謂歸夫家也孔氏曰女子出嫁爲祖父母及兄弟爲父後者皆期九月謂本是期而降在大功者按喪服女子爲父母卒哭折筭首鄭注謂卒哭喪之大事畢可以歸夫家此云既練歸不同者熊氏云卒哭可以歸是可以歸之節其實歸時在練後也

公之喪大夫俟練士卒哭而歸

鄭氏曰此公公士大夫有地者也其大夫士歸者謂素在君所食都邑之臣皇氏曰素先也君所食都邑謂公士大夫之君采地言公士大夫在朝廷而死此臣先在其君所食之采邑君喪而來服至小祥而各歸也孔氏曰公士大夫有地之君其臣下呼此有地大夫之君爲公故曰公之喪大夫士者此君下之臣也知此公是有地之公士大夫者以其臣大夫待練士待卒哭而歸故知非正君按雜記大夫次於公館以終喪士練而歸彼謂正君與此殊也山陰陸氏曰言俟暑哀之殺早矣據父母既練而歸曰既哀有餘也

大夫士父母之喪既練而歸朔月忌日則歸哭于宗室

諸父兄弟之喪既卒哭而歸

鄭氏曰歸謂歸其宮也。忌日死日也。宗室宗子之家也。謂殯宮也。禮命士以上父子異宮。孔氏曰大夫士謂庶子爲大夫士也。此明庶子遭喪歸家之節。父子異宮故有父母之喪至小祥各歸其宮也。適子則終喪在殯宮。朔月朔望也。宗室適子家殯宮也。雖練各歸至忌日及朔望則歸殯宮也。諸父諸兄弟並期爲輕故至卒哭而各歸賀氏云此弟謂適弟則庶兄爲之適子卒哭乃歸下云兄不次於弟謂庶弟也。

父不次於子兄不次於弟

鄭氏曰謂不就其殯宮爲次而居孔氏曰喪既畢故尊者不居其殯宮次也。

右記喪次凡一節





禮記纂言卷十